

ARRÜNA QUIATARRÜ NARRTARRTI SAN JUAN APOCALIPSIS

Arrüna ümoche na librurrü

1 ¹Toneño nurarrti Tuparrü, arrüba botorrio ümoti Jesucristo, nauqui atocoti uraboiti isucarü bama icocoromati, na atusi ümoma arrüna conto pasabobo. Arrti Jesucristo bacüpuruti ümoti taman ángel, nauqui uraboiti isucarüñü Juan. ²Arrüñü Juan caüma iconomota nurarrti Tuparrü ichepe nurarrti Jesús y nanaiña arrüna yarrtai y ñoncoi.

³Urria nacarrüma bama leheboma arrüna nicororrü. Urria ito naca bama oncoimia y arrübama icocotama, itopiqui tüsaimia manu tiemporrü anche ñana cumplibo.

Maconomonoti Juan

⁴Arrüñü Juan, nirraqionco tanu ümo bama icocoromati Jesús au manio siete puebluca au manu cürrü nürirri Asia. Taiquiana urria nabaca uiti Tuparrü y ui bama siete Espíritu aboma esati Tuparrü y uiti Jesucristo. Tari icunusüancanama año. Arrti Tuparrü anancatiatai tücañe, anatiquito caüma y anatiqui ñana. ⁵Arrti Jesucristo urapoiti nurria usucarü nanaiña arrüba ñemanauntu. Cusürüboti asüboriti tato uturuqui macoiñoca, ümo chanantopü aconti tato. Arrti ane manrrü nüriacarrti pünanaqui bama mayüriabuca icu na cürrü. Uiñanaunati, itopiqui ucuasürüca ümoti. Coiñoti otopiqui apü curusürrü. ⁶Tonenti naqui uiche aiyoberabarati oñü nauqui üriaburuti oemo. Isamunuti oñü sacerdoterrü ümoti Yaütoti, nitüsüru nupucünuncu y numanauncu ümoti. Amén.

⁷Amasasatü, arrti Jesucristo cuati ñana omeana cüsaüboca isucarü namanañña macrirrtianuca icu na cürrü. Hasta arrübama itabairomati tücañe asaramatito ñana. Aüboqui ñana macrirrtianuca auqui nanaiña nacioneca tosibicoma, areoroma ui nirrucurrüma, arrtü tücuati tato. Sane te, amén.

8—Arrüñü anancañü auqui ñemonco —nanti Tuparrü —y arrtü omensoro nanaiña arrüba omirriante, pero arrüñü chiñensocapü.

Anancañüatai tücañe, yacaiquito caüma, yacaiquito ñana. Arrüñü champü tacanache nisüriaca.

Artri Juan asaratiti Cristo

9Arrüñü Juan, isaruqui año y autaqisürüsapa icu na cürü auqui naca nüriacartri Jesús oemo. Ñasamuca tairri, tacane ito arraño, ui nubarrüperaca cümenuti Jesús. Tütane nüriacartri oemo. Arrüñü yaca au preso au manu cürü cümünta turrü, nürirri Patmos, itopiqui anancañü surapoi nurartri Tuparrü, arrüna tütusio nurria oemo caüma uiti Jesucristo.

10Sane pasabo iñemo: Taman nanenese tominco yasacatü auqui quiatarri niyasata uiti Espíritu Santo. Ñoncoi auna sane chacüñü arrone nurria manitacarrü tacanapae arrone puuru tapacürü. 11Nantü iñemo sane:

—Arrüñü anancañü auqui ñemonco, arrüñü ito yacaiqui ñana arrtü nanaiña omensoro. Aiconomo icu taman librurrü arrüna arrtai caüma. Aicüpu manu nicororrü ümo bama icocoromañü au manio siete puebluca nobürirri Efeso, Esmirna, Pérgamo, Tiatira, Sardis, Filadelfia, Laodicea, taha au manu cürü nürirri Asia.

12Auqui yasücübüca tato, na yasaratü ümoti maniqui manitana iñemo.

Yasacatü caüma auqui quiatarri niyasata ñome manio siete cantreruca oro.

13Cümünta manio siete cantreruca yasacatü ümoti taman ñoñünrrü, isiapae nacartri naqui Aütortri Tuparrü. Naibirtri abaesa, iñatai chepe nipopertri.

Poñoeno nitusirtri ui oro. 14Purusubi nitanurtri tacanapae naborrü. Arrüba nirrtortri tacanapae omo pese. 15Bucüara oboi nipopertri tacana arrone bien tacuquio oro. Nurartri cüpurabo tacana arrone nösicü chama turrü. 16Au nepanauncu nehertri abe siete nostonëca. Ahiquiti tusio taman cüsese ñaupaña nurria, torrücaü nohorrü. Nisurtri cuara tacana nicuaca surrü, arrtü urria napese.

17Numo yasacatü ümoti, ichaübüca esati tacanarrtü isonca. Pero arrti iñatati nepanauncu nehertri ñonüñü, nanti iñemo:

—Tapü airruca, arrüñü anancañü auqui ñemonco. Ane nisüriaca. Arrtü omensoro nanaiña arrüba abe, pero arrüñü chüpuerurrüpü ñenso, yacaiqui.

18Arrüñü isüboriquia. Isonca tücañe, pero caüma isüboriquia tato. Champü nitacüru nisüboriqui. Arrüñü ane nisüriaca ümo concorrü y ümo nicü bama coiño. 19Aiconomo arrüna arrtai y arrüna pasabo caüma y arrüna cuatiqui ñana. 20Suraboira caüma asucarücü isane ümoche arrümanio siete nostonëca abe au nepanauncu niñe, y manio siete cantreruca oro. Arrümanio siete nostonëca, ta tonema manuma siete mañoñünca bacuirarama itacu bama icocoromañü au manio siete puebluca. Arrümanio siete cantreruca, ta tonema bama icocoromañü acamanu.

Manitacarrü ümo bama au Efeso

2 ¹Aconomo ümoti maniqui bacuirara itacu manuma icocoromañü au manu pueblurrü Efeso, ucanü sane ümoti: “Sane nurarrti aume maniqui abe siete nostoñeca mecuti, y amencoti omeana manio siete cantreruca oro: ²Tusio iñemo arrüna napisamute y arrüna tairri napatrabacaca. Apasamuca tairri ümo. Chapasuquiucapüma bama churriampü nisüboriquirrima acamanu abarrüpecu. Apisuputacama bama namatü apostolerrüma, abu ñapanturrüma. Tabüco aboi arrümanu ñapanturrüma. ³Tusio ito iñemo tarucapae nautakisürücü ichopiquiñü, pero ta apasamuca tairri, y tacane chubatapü aume. ⁴Pero ane na taman churriampü iñemo aboi: Chauqui chisuasürücaiquipü nurria aume tacana tücañe numo aübo apicocoroñü. ⁵Apaquionsaño nurria causane nausüboriqui tücañe. Apiña tatito isiu tacana tücañe. Arrtü chapinörroncocañopü, isecatü aume na iquiaübu naubesa cantrerurrü omeanaqui manio siete, y amamenca tato eana nomünantü. ⁶Pero ta, ane ito arrüna urria iñemo aboi: Arraño churriampito aume arrüna nisamutema manuma nicolaitarrü, arrümanuma süroma isiu ñapanturrti maniqui ñanunecarrü, nürirrti Nicolás. Arrüñü ito churriampü iñemo arrüna nisamutema.

⁷Artri naqui rranrrü oncoi, tari onsaperati arrüna nurarrti Espóritu Santo ümo bama icocoromañü. Arrübama macanana ümoti maniqui macocono yasapacama nüta manu suese bachebo süboriquirri, arrüna ane au Paraíso, auna cauta nacarrti Tuparrü”.

Manitacarrü ümo bama au Esmirna

⁸Aconomo ito ümoti maniqui bacuirara itacu manuma icocoromañü au manu pueblurrü nürirri Esmirna. Urasoi sane: “Artri Jesucristo nanti aume: Arrüñü anancañü auqui maübo. Yacaiquito ñana arrtü tanaiña champüqui. Arrüñü isonca tücañe, pero isüboriquia tato. Sucanañü ito aume: ⁹Tusio iñemo arrüna nautakisürücü auqui niyaca, y arrüna naupoberequi auna icu na cürrü, pero ta rricurrü año au napese. Tusio ito iñemo arrüna ñaniticarrüma aume bama namatü israelitarrüma, y tacane iñanaunumati Tuparrü, abu chüsanempü. Arrüma icocotama nurarrti choborese. ¹⁰Cuantionqui taquisürücüca aume, pero tapü aupirruca ñomünana. Aboma bama abuturuqui süroma au preso. Arrüna sane ta uiti choborese, nauqui aiñanti macocotorrü aume. Autaquisürüca baeta ñome diez naneneca. Pero tapü mameso napacoconauncu iñemo cheperrtü auconca. Arrüna naucua ñana sobi, tone nausüboriqui au napese.

¹¹Artri naqui rranrrü oncoi, tari onsaperati arrüna nurarrti Espóritu Santo ümo bama icocoromañü. Arrübama macanana ümoti maniqui macocono, chüpenecopüma au infierno”.

Manitacarrü ümo bama au Pérgamo

¹²Aconomo ito ümoti maniqui bacuirara itacu bama icocoromañü au manu pueblurrü nürirri Pérgamo. Urasoi ümoti arrüna sane: “Sane nurarrti aume maniqui uiche ane manu cüsese torrücaü nohorri: ¹³Tusio iñemo, pohoso año au manu pueblurrü auna cauta ane nüriacarrti choborese. Pero isuasürücaiqui aume, champürrtü tacürusu napaquionco iyoñü, ni nauquichepü tütaborioti Antúpas amopünanaqui. Arrti coiñoti itopiqui nisura acamanu auna cauta ane nüriacarrti choborese. ¹⁴Pero abe ito arrüba chomirriampü iñemo aboi: Arraño apicheta asioma acamanu abarrüpecu bama isamutema tacana nisonirrti Balaam tücañe. Arrti maniqui Balaam tücañe iñununecanatiti Balac na atachemacati ümo bama israelitarri, na acumanama ümo bama maquiataca matupaca masantuca, y tacane na avivimia tacana numuquianca, champü nurabomacü ümomantoe. ¹⁵Aboma ito abarrüpecu manuma chirranrrüpüma aiñocomo ñanunecaca manuma nicolaitarri. Arrümanu manunecatarrü champürrtü urria iñemo. ¹⁶Sane nauquiche apiñorroncosaño. Apiñoco manu churriampü nausüboriqui. Arrtü chapñorroncocañopü, yeca tanu rrahi ümo manuma churriampü nisüboriquirrimia aübu na cüsese sahiquiñü, o sea aübu nisura.

¹⁷Arrti naqui rranrrü oncoi, tari onsaperati arrüna nurarrti Espiritu Santo ümo bama icocoromañü. Arrübama macanana ümoti maniqui macocono yasapacama ñana arrümanu pan nürirri maná, arrümanu ane anecanaiqui sobi. Yacheca ito ñana ümo taiquianati taman tachürüma purusubi aübu nuevurrü nürirrti corobo apü. Champüti quiatarrü atusi ümoti isane arrümanu nuevurrü nürirrti, tamantiatai naqui ümoche atorri”.

Manitacarrü ümo bama au Tiatira

¹⁸Aconomo ito ümoti maniqui bacuirara itacu manuma icocoromañü au manu pueblurrü nürirri Tiatira. Urasoi arrüna sane ümoti: “Sane nurarrti Aütorrü Tuparrü aume, maniqui tacanapae nonco pese nirrtorrti y bucuara tacana oro nipopertri: ¹⁹Tusio iñemo arrüba napisamute y arrüna naucuasürüci aumeampatoe. Abacaiqui isiuñü. Tarucu napayuraca ümo macrirrtianuca. Tusio iñemo napasamucu tairri ümo nautakisürüci. Manrrü urria napachücoi caüma pünanaqui tücañe. ²⁰Pero ta, abe ito ba chomirriampito iñemo aboi: Arraño apicheta asio abarrüpecu arrümanu päirrü, nürirri Jezabel. Tone mapaña anita au nürirrti Tuparrü, abu ta iñununecanama bama baserebioma iñemo, na avivimia tacana numuquianca, champü nurabomacü ümomantoe, y na acumanama ümo bama maquiataca matupaca masantuca. ²¹Tücoboi suraboi isucarü na aiñoco arrümanu sane nisonirri, pero chirranrrüpü. ²²Amonsapesio caüma arrüna nisura aume: Arrüñü yacheca caüma norrocorrü ümo manu päirrü. Arrübama aboma isiu chiyaupü nitaquisürüciürüma sobi, arrtü chiñocotapüma arrümanu sane nisüboriquirrimia. ²³Arrübama aübosirri itabaiquiama, na atusi ümo manuma

icocoromañü, tusio te iñemo arrüna ñapensacarrüma y arrüna nirrantiümoma au nitusirrimia. Arrüñü isamute aume tacana arrüna napisamute.

²⁴Arrübama mañanunecaca namatü champü tacanache nipiaccarrüma, pero arrümanu nipiaccarrüma torrio uiti choborese. Caüma rranitaca ito ümo bama aboma acamanu au Tiatira, bama chüsüropü yusiu manio chomirriampü manunecataca. Sucanañü sane aume: Champü manrrü nirraccüpucu aume.

²⁵Tapü apiñensonocoquio manio omirria napanauncu cheperrrü iseca tato.

²⁶Arrübama macanana ümoti maniqui macocono chepe nitacüru nisüboriquirrimia, y chunapüma ñacoconauncurrüma ümo nirraccüpucu, tonema bama yacheca ñana üriacaboma na üriaburuma ñome nacioneca.

²⁷Orronene nurria yacüpucurrüma ñome, tacanarrtü baparriquia parropeca ui baretarrü. Isiataito arrüna nisüriaca torrio iñemo uiti Iyaü. ²⁸Isamucama tacana nocoborese, arrone tusio nurria arrtü tücuatü nanenese, na atusimia ito eana macirrtianuca. ²⁹Arrti nauqui rranrrü oncoi, tari onsaperati arrüna nurarrrti Espüritu Santo ümo bama icocoromañü”.

Manitacarrü ümo bama au Sardis

3 ¹Aconomo ito ümoti maniqui bacuirara itacu manuma icocoromañü au manu pueblurrü nürirri Sardis. Urasoi ümoti arrüna sane: “Sane nurarrrti Cristo aume, naqui aboma bama siete Espüritu esati, y abe arrümanio siete nostoneca mecuti: “Tusio iñemo arrüna napisamute. Tacanapaepü urria nausüboriqui, abu ta abaca tacanarrtü auconca au niyasata. ²Apicoñoco nausüboriqui. Amasasatü itacu bama tirranrrapae atacüru ñacoconauncurrüma ümoti Tuparrü. Itopiqui arrüna napisamute champürrtü urria ümoti Tuparrü. ³Apaquionsaño iyo nurarrrti Tuparrü arrüna amoncoi y arrüna apasutiu tücañe. Apiñorroncosaño. Arrtü chapicoñocotapü nausüboriqui, isecatü aume tacanati cusüpürrü. Chütusiopü aume anche ayetü carrticurrü aume sobi. ⁴Pero aboma bama mümanama acamanu abarrüpecu au Sardis, chümamesopü ñapanauncurrüma. Tonema bama aboma ñana ichepeñü, purusubi naibirrimia sobi, itopiqui ticoñocotama nisüboriquirrimia.

⁵Arrübama macanana ümoti maniqui macocono ichepe nitacüru nisüboriquirrimia, torrio ümoma sobi aibiboma purusubi. Chüborrabopü sobi nürirrimia icuqui manu liburrü arrüna cauta ane corobo nüri bama champü nitacüru nisüboriquirrimia. Surapoi nürirrimia isücarüti Bae Tuparrü y arrübama angelerrü. ⁶Arrti naqui rranrrü oncoi, tari onsaperati arrüna nurarrrti Espüritu Santo ümo bama icocoromañü”.

Manitacarrü ümo bama au Filadelfia

⁷Aconomo ito ümoti maniqui bacuirara itacu bama icocoromañü au manu pueblurrü nürirri Filadelfia. Urasoi ümoti arrüna sane: “Arrti Cristo tonenti naqui samamecanati ümoti Tuparrü. Chipiacatipü apanti, ane nüriacarrrti tacanati yüriaburrü David tücañe. Arrtü ane isane iyaübutati, champüti

naqui puerurrü aiñamati tato. Y arrtü ane isane iñamatati, champütito naqui puerurrü aiyaiübuti tato. Sane nurarrti aume: ⁸Tusio iñemo arrüna napisamute. Champürtrü tarucapae naucüsü, pero ta apicocota nisura, y chaucisocapü aübu nisüri. Sane nauquiche iyaübuta taman tururrü aume, y champüti naqui puerurrü aiñamati amopünanaqui. ⁹Aboma bama namatü que israelitarrüma y tacane iñanaunumañü, abu ñapanturrümantai, icocoromati choborose. Pero tiene que ariorrüma sobi achesoimia aubesa, y tiene que atusi ümoma tarucu naucua iñemo. ¹⁰Arraño apicocota nirrácüpucu, apasamu tairri ñome nautakisürücü. Sane nauquiche rracuiraca ñana autacu, arrtü iñatai manu horarrü anche ensimunu ane macocotorrü ümo bama aboma icu na currü. ¹¹Apaquionsaño: Contoatai yeca tanu. Apacuirä nurria itacu arrüna iyebo aboi isiquiñü, tapü anati iquiaübuta amopünanaqui arrüna naucua sobi.

¹²'Arrübama macanana ümoti maniqui macocono ichepe nitacüru nisüboriquirrimia, isamucama tacana nompacüorrüma ümo niporrti Tuparrü au napese. Chüpenecopüma auqui manu. Iconomota ito icütüpüma nürirrti Tuparrü y nüri nesarrti pueblurrü, arrümanu nuevurrü Jerusalén cuatü auqui napese uiti Tuparrü. Tacane iconomota ito cütüpüma nuevurrü nisüri. ¹³Arrti naqui rranrrü oncoi, tari onsaperati arrüna nurarrti Espiritu Santo ümo bama icocoromañü”.

Manitacarrü ümo bama au Laodicea

¹⁴Aconomo ito ümoti maniqui bacuirara itacu bama icocoromañü au manu pueblurrü nürirri Laodicea. Urasoi arrüna sane: “Arrti Cristo tonenti naqui ümoche puerurrü oñoncatü. Uiti tusio oemo nürirrti Tuparrü. Uiti omirriane nanaiña arrüba abe. Arrti nanti sane aume: ¹⁵Tusio iñemo arrüna napisamute. Arraño chapicococapüñü nurria, pero ta apicococañü pario. ¿Causanempü chapicococapüñü nurria? o si no itari uiqui taman te tapü apicococañü! Pero apicococañü parioatai. ¹⁶Sane nauquiche caüma ipenecaño yesaquiñü, ui na chümarrtacarrüpatai aume. ¹⁷Arraño amucanaño champü causane nausüboriqui aübuti Tuparrü, y champü isane faltabo aume. Pariquipü chapapensacapü que au niyasata abaca tacana poberrü año, y tarucu nitaquisürücü nabausüpü. Amamenca au tomiqüianene tacanarrtü ausupuca, y tacanarrtü champü nabaibi. ¹⁸Sane nauquiche suraboira ausucariü nauqui apacanane nausüboriqui urria tacana oro, tapü ane isane faltabo aume, y tacane na urria caüma nausüboriqui saübuñü. Apacompöra ito yesaquiñü abaibibo arrümanu purusubi, tapü tusiapae naucüso. Apacuirä ito ümo namasata, na aparrtanaun tato, tapü abasiqüia amamen au tomiqüianene. ¹⁹Arrüñü rracuansomococa ümo bama cuasürü iñemo. Yacheca carrticurrü ümoma, nauqui aicoñocoma nisüboriquirrimia. Tapü ünantü aume arrüna icuansomococaño. ²⁰Apaquionsaño: Arrüñü yaca abeu tururrü, iyotobaita. Arrtü anati naqui oncoiti nirrabiqüi, iyaübutati nitururrti, yecatüpo esati, na irra aübuti y arrti saübuñü.

²¹'Arrübama macanana ümoti maniqui macocono ichepe nitacüru nisüboriquirrimia, icheta ñana ümoma atümoma ichepeñü au niyesa

tronorrü. Arrüñü isiatäi rracanaca ümoti maniqui macocono, sane nauquiche caüma yaca ichepeti Iyaü au nesarrti tronorrü. ²²Artri naqui rranrrü oncoi, tari onsaperati arrüna nurartri Espíritu Santo ümo bama icocoromañü”.

Manauncurrü au napese

4 ¹Auqui yasacatü ape, besüro niyasata ümo taman tururrü aurübo au napese. Ñoncoi tatito arrone nurria manitacarrü, arrümanu ñoncoi tücañe tacanapae arrone puuru tapacürrü. Nantü iñemo sane:

—Ariacu tauna ape, na itusianca asucarücü arrüna pasabobo ñana.

²Au manu rrtorrrü campiabo naca niyasata uiti Espíritu Santo. Yasacatü caüma ümo taman tronorrü ane au napese, y ümotito maniqui tümonso ahu, abu artri Bae Tuparrü. ³Artri maniqui tümonso au manu tronorrü anentarrtai nicütüpürrti, tacanapae arrümanio omirriantai camanca, nobüirri jaspe y cornalina. Itupecu manu nesarrti tronorrü ane taman nirrirri, tacanapae arrümanu cama nobütama nisurrü, nürirri esmeralda. ⁴Abe ito piquiatata tronorrü itupecu manu tronorrü, veinticuatro nububiquirri. Aboma tümonsoma veinticuatro mañoñünca ubau, arrübama mamayoreca. Purusubi naibirrimia. Ane ito nitarusürrüma oro. ⁵Auqui manu tronorrü masünaca y mapaesoca tatito. Rabotito manitacaca. Abe ito esa tronorrü manio siete basaruca, abu ta tonema arrümanuma siete Espíritu aboma esati Tuparrü.

⁶Esa manu ito tronorrü ane arrüna cuara tacana taman narubaitu turrrü cücheseña tuma ahu, anentarrtai pürücü tacana vidrio. Itupecu manu tronorrü aboma bama cuatro süboricoma, ataso nicütüpürrüma ui sütoca, auna sane cümenuma y chacuma ito. ⁷Artri maniqui primero uturuquimia tacana nocütürüquiortti, artri maniqui quiatarrü tacana tororrü, artri maniqui quiatarrü arrüna nisurrti tacana nisurrti ñoñünrrü, artri maniqui tacürurrü tacana arrone nutamonrirri basoro. ⁸Manuma süborico cadati taman abe seirri nipiarrti tacana nipia nutauma. Ubataso oboi sütoca auna omonü, y ñoquiana. Chümacansarapüma, naneneca y tobiquia nitosibirrimia namatü sane:

Tarucu nüriacartri Tuparrü, tarucu nüriacartri Tuparrü, tarucu nüriacartri Tuparrü, naqui champü tacanache nicusüurrti.

Tanancatiatai tücañe, anati caüma, anatiquito ñana.

⁹Arrümanuma cuatro iñanaunumati maniqui tümonso au tronorrü, naqui champü nitacüru nisüboriquirrti. Machampiencanama ito ümoti.

¹⁰Sane ito ui arrübama veinticuatro mamayoreca, bachesoiyoma esati Tuparrü, naqui tümonso au tronorrü, naqui champü nitacüru nisüboriquirrti. Manaunuma ümoti. Iñatama acü nitarusürrüma, namatü:

¹¹Arrücü Tuparrücü y Señorcü suiñemo, chiyaupü napanauncu, champü tacanache nanentacarrü obi.

Sopiñanauncü, chiyaupü nacusüu, itopiqui omirriante obi isiu narrianca nanaiña arrüba abe.

Arrümanu Nobirrama y manu quichonimiacarrü

5 ¹Auqui yasacatü ümoti maniqui tümonso au manu tronorrü, au nepanauncu neherrti ane quichonimiacarrü quiñoeno, corobo icu y pürücü ito. Abe siete nitomoentorrü. ²Au manu rratorrü rabotü nitosibirrti taman ángel, naqui tarucu nicusüurrti, nanti sane:

—¿Quiti naqui puerurrü aisoquisünati y aiyäübuti arrüna quichonimiacarrü?

³Pero ni icuquipü cürrü, ni au napesepü, ni iquianapü cürrü anati naqui puerurrü aisoquisüna nitomoentorrü, na aurü, y nauqui leheboti.

⁴Auqui arrone nurria nisareo, itopiqui champüti tabüco naqui puerurrü aiyäübuti manu quichonimiacarrü na leheboti arrüna corobo icu. ⁵Auqui tamanti uturuqui manuma mamayoreca nanti iñemo:

—Tapü areoca. Anati auna naqui arucu nurria ümoti, naqui üriatu bama israelitarrü. Ipiarientetorrü yüriaburrü David. Macananati ümo nomünantü. Tonenti caüma naqui samamecana, nauqui puerurrü aiyäübuti manu quichonimiacarrü.

⁶Auqui yasacatü eana manuma veinticuatro mamayoreca y eana manuma cuatro süborico esa tronorrü, ane taman Nobirrama atürai, tonenti Jesucristo. Tusioiqui nurria nobüriturrü ümo, arrüna uiche acon tücañe. Abe siete nitapacürrü y siete nistorrü. Arrümanio siete nistorrü, ta tonema bama siete nesarrti Espiritu Tuparrü. Arrti Bae Tuparrü bacüpuruti ümo manuma siete Espiritu nauqui ariorrüma au nanaiñantai icu cürrü.

⁷Auqui sürotü manu Nobirrama esati maniqui tümonso au tronorrü. Yasutiu mecuquiti arrümanu quichonimiacarrü. ⁸Numo tiyasutiu, arrümanuma cuatro süborico ichepe arrümanuma veinticuatro mamayoreca bachesoiyoma esa, na anauma ümo. Cadati taman ane uiti taman violín ichepe taman coparrü oro aübu rrioriocom ahu. Arrümanu rrioriocom, tone neancarrüma bama samamecana ümoti Tuparrü.

⁹Auqui macantarama arrümanu nuevurrü ñacantacarrüma, nantü sane: Arrücü samamecanacü nauqui asuriu manu quichonimiacarrü y aisoquisünanio nitomoentorrü, itopiqui aichücü tücañe aitabairomacü. Ui noto ataesümunucuca eanaqui nomünantü ümo bama macrirrtianuca auqui nanaiña nacioneca, auqui nanaiñantai manitacaca, nauqui aye uimia esati Tuparrü.

¹⁰Arrüma caüma yüriaburrüma obi, sacerdoterrüma ito ümoti Tuparrü. Ane ñana nüriacarrüma icu cürrü.

¹¹Auqui yasacatü ichupecuñü, ñoncoi ñanitaca bama cütüppürrü angelerrü aboma itupecu tronorrü. Sürümana millones nubiquirrimia. Aboma ito manuma cuatro süborico y arrümanuma mamayoreca.

¹²Fuerte nitosibirrimia, urapoimia arrüna sane:

Arrüna Nobirrama ichübü atabori tücañe.

Urria asuriu üriacabo, enarribo, ipiacabo, icusüubu, anentacabo uiti

Tuparrü.

Uiñanauna.

¹³Auqui ñoncoito nitosibi nanaiña bama aboma au napese, y bama aboma icu cürrü, y bama aboma iquiana cürrü, y arrüba abe au narubaitu turrü, nanaiña arrüba urriante uiti Tuparrü. Namatü sane:

Champü tacanache nacarrti.

Tarucu nüriacarrti y nanentacarrti.

Sane nauquiche manauna ümoti maniqui tümonso au tronorrü, y ümo manu Nobirrama.

¹⁴Auqui namatü caüma arrümanuma cuatro süborico:

—Amén, sane te. Arrümanuma mamayoreca bachesoiyoma y manaunuma ümoti Tuparrü, naqui champü nitacüru nisüboriquirrti.

Arrümanio siete nitomoento quichonimiacarrü

6 ¹Isucarüñü nurria ito arrümanu Nobirrama isoquisünata taman nitomoento manu quichonimiacarrü. Rabotü nitosibirrti maniqui taman uturuqui manuma cuatro süborico, arrone nurria tacanarrtü süuru, nanti sane: —Ariacu.

²Auqui yasacatü. Besüro niyasata ümo taman cabayurrü purusubi. Anati taman ñoñünrrü chacu. Ane cümomese uiti. Torrio taman tarusürrü ümoti itobo na ñacanacarrti, na acanatiqui manrrü.

³Numo soquisüro quiatarrü nitomoento manu librurrü ui manu Nobirrama, rabotito nitosibirrti maniqui quiatarrü uturuqui manuma süborico, nanti sane: —Ariacu.

⁴Auqui paecüburu caüma quiatarrü cabayurrü, cüturiqui nicütüpürrü. Arrti maniqui anati chacu torrio ümoti taman cüsese sürümanarrü. Torrio ito ümoti üriacaboti nauqui puerurrti aiñarrimiacati nomirria icuqui cürrü, na tapü cuasürüma macirrtianuca ümomantoe. Uiti caüma itabairomacü uirrimiantoe.

⁵Soquisüro ito caüma quiatarrü nitomoento manu librurrü ui manu Nobirrama. Rabotito caüma nitosibirrti maniqui quiatarrü uturuqui manuma süborico, nanti sane:

—Ariacu.

Yasacatito caüma ümo quiatarrü cabayurrü, cübüsi nicütüpürrü. Arrti maniqui anati chacu ane taman mapesatarrü mecuti. ⁶Rabotü taman tosibirri uturuqui manuma cuatro süborico, nanti sane:

—Tamantai kilo trigo itobo taman sapese trabacorrü y trerrü kilo narorrü (cebada) itobo taman sapese trabacorrü. Tapü nasaite y niyü uva champürrtü carurrapae.

⁷Isoquisünata ito Nobirrama arrümanu quiatarrü nitomoento manu librurrü. Rabotü nitosibirrti maniqui tacürurrü uturuqui manuma cuatro süborico, nanti sane:

—Ariacu.

⁸Yasacatito caüma ümo quiatarrü cabayurrü, choriopatai nicütüppürrü. Arrti maniqui anati chacu, concorrü nürirrti. Isiuti caüma cuamatü bama macoiñoca auqui manu cauta amoncoma. Torrio ümoma üriacaboma na atabaimia ümo cuarta parterrü macrirrtianuca icuqui cürrü, ui guerra, cürüpürrü, norrococa y oboi numuquianca arrüba patabaiyo genterrü.

⁹Numo soquisüro manu quiatarrü nitomoentorrü, yasacatü ñome nausüpü bama coiñoma tücañe itopiqui urapoimia nurarrti Tuparrü. Abe iquiana altar. ¹⁰Botosibico nurria, munantü sane:

—Arrricü Señor, urria nachücoi, cumplibocü aübu nura. ¿Auchepü ñana atoco ümo manuma uiche aitabairoma somü tücañe taha icu cürrü, na aiña ito ümoma tacana arrüna yachücoimia suiñemo tücañe?

¹¹Auqui torrio aibiboma purusubi. Bacüpucurrü ito ümoma arrüperamainqui pario cheperrtü tiñatai nubiqui bama maquiataca yaruquitorrüma, bama imostorrü Tuparrü, bama abomainqui icu cürrü. Coiñomainquito tacana arrüma tücañe.

¹²Numo soquisüro manu quiatarrü nitomoentorrü ui Nobirrama, paichoconono cürrü. Surrü caüma cübüsi nisurrü, tacana luto, tapü pama cüturiqui tacana notorrü. ¹³Norrtoñeca bupaquio acü auqui napese, tacana arrobe nobüta higo bupaquio icütüpiqui nihirri, arrtü maquiütica fuerte. ¹⁴Masamuña ensoro napese tacana arrone quinoencana quichonimiacarrü. Nanaiña yirituca y cüca arrüba abe cümünta turrü mopeneco auqui na cauta amonquion. ¹⁵Nanaiña arrübama mayüriabuca icuqui cürrü ichepe bama tarucu nane ümoma, bama rricurrü, y bama üriatu masortaboca, bama tarucu nüriacarrüma ichepe bama imostorrüma y arrübama abomantai, matanecanama omeana yirituca au arrüba nusutu canrrü, y ñoquiana canca. ¹⁶Namatü sane ñome manio yirituca y ñome manio canca:

—Aupaqui somonü, na apiñanecanasomü ñünanati Tuparrü, maniqui tümonso au tronorrü, y ñünana nitübori manu Nobirrama. ¹⁷Chauqui tiñatai arrüna nanenese nesa carrticurrü suiñemo. ¿Quitipü naqui puerurrü avantabo ümo?

Arrübama tacümanauncunu eanaqui bama israelitarrü

7 ¹Auqui yasaratü ümo manuma cuatro angelerrü atüraimiamia au cuatro nerrquina cürrü. Iñanamacü ñocümenu ba cuatro maquiütica, tapü upausücüro ümo cürrü ñome sueca, ni ümopü narubaitu turrü. ²Yasacatito cümenuti maniqui quiatarrü ángel, cuati auqui tauna ümo tansürü, ane uiti arrümanu sellorrü nesarrti Tuparrü, naqui ñemanauncurratöe süborico. Tosibicoti maniqui ángel sane ümo manuma cuatro angelerrü, bama torrio üriacaboma na puerurrüma aiñamesocoma cürrü y narubaitu turrü. Nanti sane ümoma:

³—Tapü ane causane aboi ümo cürrü y ümo narubaitu turrü, tapü ane causane ito aboi ñome sueca, cheperrtü tüsüro sobi sellorrü icuta bama imostorrü Tuparrü.

⁴Noncoito caüma arrümanu nubiqui bama sellabobo: ciento cuarenta y cuatro mil eanaqui manuma israelitarrü. Tarinan auna arrümanu listarrü:

⁵Doce mil eanaqui nesarrti familiarrü Judá, doce mil eanaqui nesarrti familiarrü Rubén, doce mil eanaqui nesarrti familiarrü Gad, ⁶doce mil eanaqui nesarrti familiarrü Aser, doce mil eanaqui nesarrti familiarrü Neftalí, doce mil eanaqui nesarrti familiarrü Manasés, ⁷doce mil eanaqui nesarrti familiarrü Simeón, doce mil eanaqui nesarrti familiarrü Leví, doce mil eanaqui nesarrti familiarrü Isacar, ⁸doce mil eanaqui nesarrti familiarrü Zabulón, doce mil eanaqui nesarrti familiarrü José y doce mil eanaqui nesarrti familiarrü Benjamín.

Bama sürümana aibioma purusubi

⁹Auqui yasacatito ümo manuma sürümanama macirrntianuca auqui nanaiña nacioneca y aruqui nanaiñantai ñanitacarrüma, bama champüti puerurrü aipiacümuncunuma. Aboma esa manu tronorrü y esa manu Nobirrama. Purusubi naibirrimia. Ane nasu mutacürrü mecuma.

¹⁰Enterurrüma tosibicoma, namatü sane:

Arroñü utaesübuca eanaqui nomünantü uiti naqui tümonso au tronorrü y ui manu Nobirrama (uiti Tuparrü y uiti Jesucristo).

¹¹Arrümanuma angelerrü aboma itupecu manu tronorrü ichepe manuma mamayoreca y arrümanuma cuatro süborico bachesoiyoma esa manu tronorrü, mataconoconoma, manaunuma ümoti Tuparrü, namatü sane:

¹²Amén, sane te.

Tari champü nitacüru numanauncu ümoti Tuparrü, numachampiencaca ümoti.

Tarucu nipiaccarrti, nüriaccarrti, nicusüurrüti, y nanentacarrü esati. Amén.

¹³Auqui tamanti eanaqui manuma mamayoreca ñanquitioti rropünanaquiñü: —¿Tusio aemo quitü bama purusubi naibirrimia y auquiche ayematü?

¹⁴Sucanañü ümoti:

—Chütusiopü iñemo, pero arrücü te tusio aemo.

Auqui urapoiti isucarüñü:

—Tonema bama cuamatü icuqui cürrü, auquina cauta tarucu nitaquisürüciürrüma tücañe. Pero caüma arrüma chauqui tirrimiacana tato nomünantü uimía ui noto Nobirrama. Sane nauquiche purusubi naibirrimia.

¹⁵Sane nauquiche aboma esa nesarrti tronorrü Tuparrü. Baserebioma ümoti naneneca y tobiquia au niporrti, arrti bacuirarati itacuma. ¹⁶Chanantopü tato acürüpüma ni atosüpüma, ni ataquisürüpüma ui nipequi surrü. ¹⁷Arrümanu Nobirrama esa tronorrü yasaparama, ichamanama turrü, arrüna uiche asüborimia, y arrti Bae Tuparrü isübutati nisucürrüma, bacheboti ipucünuncuboma.

Arrüna septimo nitomoentorrü

8 ¹Nauquiche soquisüro manu quiatarrü nitomoento manu quichonimiaccarrü ui Nobirrama, cüchenaña au napese, media horarrü, champü isane rabotü.

²Auqui yasacatü ümo manuma siete angelerrü aboma esati Tuparrü. Botorrio ümoma cornetaca. ³Cuatito maniqui quiatarrü ángel atüraití esa manu altar. Torrio ümoti taman nausürrü oro aübu chama rroriocorrü, na aicubiti icu altar, na aürotü ape nausirri ichepe neanca bama icocoromati Tuparrü. Arrümanu altar pururrü oro, ane esa nesarrti tronorrü Tuparrü. ⁴Y arrümanu nausi manu rroriocorrü mecuquiti maniqui ángel sürotü ape esati Tuparrü ichepe manu neanca bama icocoromati. ⁵Auqui arrti maniqui ángel inatamacatati manu nausü rroriocorrü ui sücüborrü icuqui manu altar. Auqui yarutatibutati icu cürrü. Auqui rabotü manitacaca, nisüurrü, ñasünarrü y paichoconono cürrü.

Arrüba cornetaca

⁶Auqui caüma arrümanuma siete angelerrü acomoraboma na aipununioma nesarrüma cornetarrü.

⁷Arrti maniqui primeru ipunutati nesarrti cornetarrü. Auqui bupaquio noñoca, pese y notorrü icu cürrü. Üro arrüna tercera parterrü currü, tercera parterrü sueca y nanaiña arrüba narrüchopüro.

⁸Arrti maniqui quiatarrü ángel ipunutatito nesarrti cornetarrü. Auqui yasacatü ümo arrümanu tacana arrone yiriturrü omo, paquiancana cümüinta narubaitu turrü auqui ape. Y arrümanu tercera parterrü narubaitu turrü campiabo au manu rrtorrü tacana notorrü. ⁹Tercera parterrü arrüba bosüborico au narubaitu turrü mocoño, y tercera parterrü arrüba barcorrü, arrüba mamenco isu, omiñarrío.

¹⁰Arrti maniqui quiatarrü ángel ipunutatito nesarrti cornetarrü. Auqui paquio arrümanu porrirratoe nostonese arrone nurria noncorrü, tacana arrone ane isane omo icutacu baparrü. Paquio onü manu tercera parterrü niyosütu nusüruca y nantaituca. ¹¹Arrümanu nostonese nürirri pichananene. Sane nauquiche caüma arrüba tuca mopichananene. Cütüpürrü macirrtianuca coiñoma uirri.

¹²Arrti maniqui quiatarrü ángel ipunutatito nesarrti cornetarrü. Auqui caüma mameso tercera parterrü surrü, tercera parterrü pama y tercera parterrü nostoneca, na tapü anentarrü ümo arrüba cuatro horarrü au sapese y cuatro horarrü au tobirri, tari tomiquianene ñome.

¹³Auqui yasacatü ümo manu taman nutamonrrirri basoro apetaisürü cümüinta napese. Noncoi nitosibirri sane:

—Autakisürücatai, bama süboricoiqui icu cürrü, arrtü tübupuruito manio piquiataca cornetaca ui bama maquiataca trerrü angelerrü.

9 ¹Auqui arrti maniqui quiatarrü ángel ipunutatito nesarrti cornetarrü. Yasacatü ümo taman nostonese omeanaqui manio bupaquio acü auqui napese, abu arrti taman ángel. Torrio ümoti uiti Tuparrü yaberrü na aiyäübuti nusutu cürrü, arrüna champü nitacürrü. ²Auqui iyaübutati. Cuatanene nausirri cübüsi, tacanapae arrone auqui horno arrüna champü tacanache nisunaunrrü. Rruparrio surrü ui manu nausirri auqui nusutu cürrü, tomiquianene uirri. ³Eanaqui manu nausirri omümio nubasoroca arrüba bupasoro au nanaiña cürrü. Torrio ñome obüriacabo na abosi tacana

nupataca, nirri cürri. ⁴Bacüpucurri ñome tapü ane causane oboi ñome sueca, narrüchopüro y nanaiña arrüba obütaürri, tari ümo arrübamantai macirrtianuca, bama champü sellorri nesarri Tuparri icutama. ⁵Bacüpucurri ito ñome tapü opitabairomampae, tari taquisürüma ñome cinco panca. Y arrümanu norrocorri ui nobosiquirri tacanarrü osiyohoñü nupatarri. ⁶Au manio naneneca arrüba macirrtianuca yapachetioma causane nauqui acoma, pero ta, chütorriopü ümoma. Tarucu nirrancarrüma acoma, pero chücoiñopüma.

⁷Arrümanio nubasoroca tacana arrobe cabayuca paborio ümo guerra. Ane niyutarusürri tacana oro yuta. Arrüba niyusurri tacana nisurri ñoñünrri. ⁸Arrüna niñutanurri tacana niqui nitanu paürri, y nomohorri tacana noho nocütürüquiorri. ⁹Ane arrümanu nubaibirri tacana fierro ubauquibo. Süuru nurria niyupasocorri, tacanapae arrobe carroca motonono yusiu cabayuca, nomequirri ümo guerra. ¹⁰Icutacu nobiyorri ane nomeamporri tacana nomeampo arrobe nupataca, nirri cürri, arrüna uiche abosi ümo macirrtianuca na taquisürüma ñome cinco panca. ¹¹Anati taman ángel auqui infierno obüriatubu manio nubasoroca, nürirri “Abadón” auqui hebreo, tapü auqui griego “Apolión”, y auqui besüro “yatabayorri” nürirri.

¹²Pasao arrümanu primer taquisürücürri, pero cuantionqui torri.

¹³Ipunatatito maniqui quiatarri ángel nesarri cornetarri. Rabotü tosi birri omeanaqui manio tapacüca oro abe icu altar esa nesarri tronorri Tuparri. ¹⁴Nantü sane manu tosi birri ümoti maniqui ángel aübu cornetarri: —Aisoquisünasama manuma cuatro angelerrü aboma tomoenoma esa manu narubaitu sapoco, nürirri Eufrates.

¹⁵Soquisüroma manuma angelerrü arrüba samamecana ümo arrümanu horarri y ümo arrümanu nanenese, panrri y añorri, na aítabaimia arrüna tercera parterri macirrtianuca icuqui cürri. ¹⁶Ñoncoi nubiqui bama esarrüma soldadorri, bama aboma yuchacu cabayuca: doscientos millones nubiquirrimia.

¹⁷Auqui quiatarri niyasata, yasacatü caüma ümo manuma mañoñünca aboma yuchacu manio cabayuca. Ane auquiboma auna nitusirrimia yerurri cüturiqui, asuru y amariyu. Arrümanio cabayuca niñutanurri tacana nitanu nocütürüquiorri. Ubahiqui paecüburu pese, nausirri y azufre. ¹⁸Tercera parterri macirrtianuca coiñoma ui arrümanu pese, nausirri y azufre ubahiqui manio cabayuca. Coiñoma aboi manio trerrü plagarri. ¹⁹Arrümanu nopiaca manio cabayuca, arrüna uiche apatabai, ane icutacu nobiyorri y ubahi. Arrümanio nobiyorri tacana arrobe noirroboca, abe niñutanurri.

²⁰Pero arrümanuma nisobüratu macirrtianuca, bama chücoiñopü ui arrümanu taquisürücürri, chorronepü ümoma, isamutemainqui nomünantü. Manaunumainqui ümo bama machoboreca y ümo masantuca, arrüba urriancama uimia oro, plata, bronce, canrri y suese. Abu chasarapümatü, ni amenpüma, ni anempü isane oncoimia. ²¹Chiñocotapüma arrüna yatabaiquirrimia, nicheserucurrüma, niturapacarrüma, nicusüpücürüma.

Tamanti ángel aübu libruma

10 ¹Yasacatito cümenuti quiatarrü ángel naqui tarucu nicusüürrti, cuati auqui napese eana taman cüsaüborrü. Ane cuara nurria nirrirri onü nitanurrti. Anentarrtai ui nisurrti, tacanarrtü cuara ui surrü. Tapü arrüba nitaparrti butusio tacana nonco pese. ²Ane taman chimiamantai libruma aurübo mecuti. Ui nepanauncu nipoperrti icümotenti isu narubaitu turrü, tapü nepaurrü icümote icu cürrü. ³Auqui tosibicoti fuerte nurria tacana nitosibi nocütüriquirrü, arrtü tüborico. Arrümanu nitosibirrti opiñumuta caüma siete mapaesoca, arrüba opipiaca apanita. ⁴Irrancapü iconomo arrümanu nuburarrü, pero ñoncoi taman manitacarrü, nantü sane iñemo: —Aiñahübu aemoantai arrümanu nubura manio siete mapaesoca, tapü aiconomota.

⁵Auqui arrti maniqui ángel icümotenti isu narubaitu turrü y icu cürrü iquiampetati nepanauncu nipiarrti, asaratitü ape. ⁶Itusiancatati curusürrü isucarütü Tuparrü, naqui champü nitacüru nisüboriquirrti, naqui uiche urriane napese, cürrü, narubaitu turrü y nanaiña arrüba abe ubahu. Nanti sane:

⁷—Tüsaiapae acoco nanaiña arrüna pasabobo. Arrtü ipunutati nesarrti cornetarrü maniqui tacürrü ángel, tusio, ta tücumplibó arrümanu anecanatai ñapensacarrti Tuparrü, arrümanu turapoiti tücañe isucarü bama nesarrti profetarrü, bama baserebio ümoti.

⁸Arrümanu manitacarrü cuatü iñemo tücañe auqui napese, nanti tatito iñemo sane:

—Acosi asuriu manu aurübo libruma mecuquiti maniqui ángel icümote isu narubaitu turrü y icu cürrü.

⁹Yacatü rranquiriu pünanaquiti. Nanti sane iñemo:

—Asusui, anse. Usiña baeta ahicü tacana nuhurrü, pero arrtü tütane acübobicü, ta pichananene.

¹⁰Yasutiu manu libruma mecuquiti maniqui ángel. Irrate. Ñemanauntu, usiña baeta sahiñü, pero numo tipiuncuta, ta pichananene sübobiñü. ¹¹Nantito iñemo:

—Urria arrtü aeca tatito uraboi nurarrti Tuparrü yocütüpü manio sürümana puebluca, nacioneca, mayüriabuca y arrübama auqui piquiataca manitacaca.

Arrümanuma torrü terrticurrü

11 ¹Auqui torrio iñemo taman boquirri na yerotü imeriraca niporrti Tuparrü y arrümanu altar ane acamanu. Bacüpucurrü ito iñemo ipiacünuncunuma manuma aboma manaunuma acamanu.

²—Arrümanu nusuara tapü aimeriracata —sane bacüpucurrü iñemo—, itopiqui torrio ümo bama extranjerurrü, bama uiche emeonoma manu pueblurrü samamecana ümoti Tuparrü (Jerusalén) ñome ba cuarenta y dos panca. ³Rracüpuca ito ümo bama torrü niyesa terrticurrü —nanti

Tuparrü—, nauqui ariorrüma anitama au nisüri. Süromatü ñome ba mil doscientos sesenta naneneca. Cübüsi naibirrimia.

⁴Arrümanuma torrü terrticurrü, ta tonema arrümanio torrü suema olivos y arrümanio torrü canteruca abe esati Tuparrü, naqui üriabucati icu cürrü. ⁵Omo pese ahiquimia, ümo arrtü anati naqui rranrü ane causane uiti ümoma, üroti ui arrümanu noncorrü ahiquimia. ⁶Puerurrüma ito añañamama napese na tapü rrobeoca ümo manu tiemporrü nacarrüma manitanama, cheperrrü tütacürusu ñanitacarrüma au nürirrti Tuparrü. Puerurrü ito aisamunü turrü notorrü uimia. Puerurrüma achema taquisürücürrü ümo macrirrtianuca isiu nirrancarrüma.

⁷Arrtü tütacürusu arrümanu ñanitacarrüma, cuatü caüma arrümanu numuquianrrü auqui infierno ahi ümoma. Macanana ümoma, coiñoma uirri. ⁸Nicunturrüma caüma omonconatai isiu cayaca au manu yarusürürrü pueblurrü nürirri Jerusalén, nürirrito Sodoma o Egipto. Acamanu ito coiñoti naqui Señor tücañe. ⁹Arrübama macrirrtianuca auqui nanaiña puebluca, manitacaca, y nacioneca, trerrü naneneca y medio yasaboriquirrimia ümo nicunturrüma. Chichebopü uimia nauqui aüroma cütu. ¹⁰Arrümanu nanenese ñana yarusürürrü pucünuncurrü ui bama süborico icu cürrü. Macumananamantai ümomantoe, nipucünuncurrüma, itopiqui ta tücoiñoma arrümanuma torrü nesarrrü terrticurrü Tuparrü, bama uiche churriampatai nacarrüma tücañe. ¹¹Pero yopürücü manio trerrü naneneca y medio, arrümanuma torrü profetarrrü süboricomata tato uiti Tuparrü. Atüraimiamata tato uiti. Enterurrüma bama arrtai, yarusürürrü nirrucurrüma. ¹²Auqui arrümanuma torrü terrticurrü oncoimia manitacarrü ümoma auqui napese, nantü sane: —Ausiapata tauna ape.

Arrüma caüma süromatü ape eana taman cüsaüborrrü. Y arrübama tüboricomata icuatama arrtayomatü isiuma.

¹³Au arrümanu horarrü paichoconono cürrü, y decima parterrrü arrümanu pueblurrü iñarrio. Coiñoma siete mil macrirrtianuca uirri. Arrübama chücoiñopü aüboqui ui nirrucurrüma iñanaumumatai Tuparrü, naqui anati au napese.

¹⁴Chauqui tüpasao arrümanu segundo taquisürücürrü, pero contoatai tücuatü quiatarrrü.

Arrüna séptimo cornetarrü

¹⁵Auqui arrrü maniqui tacürürrü ángel ipunutatito caüma nesarrrü cornetarrü. Rabotio tosi biquia auqui napese, munantü sane:

Nanaiña caüma nüriacaca icuqui cürrü omeno iquiana nüriacarrrü
Tuparrü y arrrü Cristo.

Champü nitacüru nüriacarrrü.

¹⁶Auqui arrümanuma veinticuatro mamayoreca, bama aboma au nesarrüma tronorrü esati Tuparrü bachesoiyoma, mataconoconoma, manaunuma ümoti, ¹⁷namatü:

Supachampienecaca aemo, Tuparrü, itopiqui arrücü tarucu nacüsüu.

Anancüatai tücañe, acaiqui caüma, y acaiquito ñana.

Arrücü ane yarusürürü nüriaca, aübapae üriabucü.

¹⁸Tüboricoma bama macirrtianuca icu cürü aemo, pero caüma arrücü atococa atübori ümoma.

Tiñatai manu horarrü cauta acurrutama obi bama tücoiño.

Iñata ito caüma manu horarrü cauta aitorrimia nacumanata ümo bama aesa profetarrü arrübama manunecana tücañe nüri.

Aitorrimia ito nacumanata ümo bama samamecana aemo, y ümo nanaiña bama iñanaunumacü, champü ümoche obi arrtü tarucu nicuarrüma icu cürü, o champü.

Chauqui tiñatai ito arrümanu horarrü auche acoma obi bama uiche mameso na cürü, bama uiche aenso nicoñocorrü.

¹⁹Auqui aurübo manu niporrti Tuparrü ane au napese. Tusinaña manu baurirri uiche atusi nesarri tratorrü Tuparrü aübu bama icocoromati. Auqui masünaca, süuru y buyarrü. Paichoconono cürü y bupaquio noñoca sürümana.

Taman paürü y noirroborrü

12 ¹Auqui yasacatü ümo quiatarrü yarusürürü señarrü au napese. Itusiancanü ito taman paürü, cüburrio ui nicua surrü, tacanarrtü naibirri. Ñoquiana nipopese ane pama. Ane ito ita taman tarusürü, purürü nostoñeca, doce nububiquirri. ²Tochiquio manu paürü, sane nauquiche ane tosibiaca ui norrocorrü ümo, itopiqui rranrrü ane mecu.

³Auqui itusiancanü ito quiatarrü señarrü: Taman numuquianrrü ünantatai nacarrü, cüturiqui nicütüpürü, (nacarrü tacana noirroborrü). Abe siete nitanurrü y diez nitapacürü. Butarusüu manio nitanurrü. (Arrümanu numuquianrrü, ta tone nausüpürri choborese.) ⁴Ipusanacanio tercera parterrü nostoñeca auqui napese icu cürü ui niyorü. Atürai esa manu paürü, tone rranrrü ane mecu. Barrüperara ümo, na ane mecu, nauqui arati ipiaümacarrü. ⁵Nauquiche tanati icu cürü ipiaümacarrü, ñaümati. Tonenti ñana naqui yüriaburrü ñome nanaiña nacioneca. Üriabucati ñana ñome ui taman vararrü yerurrü. Au manu rratorrü cahüburuti pünanaqui manu numuquianrrü, sürotitü ape, iñataiti esati Tuparrü, naqui anati au tronorrü. ⁶Auqui arrümanu paürü besüburu eana rroense, auna cauta anancatai acomorabo uiti Tuparrü ümo, na acheti tuburibo ümo mil doscientos sesenta naneneca.

⁷Auqui ane yarusürürü bahiquirri au napese uiti arcángel Miguel ichepe bama nesarri angelerrü, aübu manu numuquianrrü y arrübama esarrü angelerrü. ⁸Macananati Miguel ümo. Auqui peneco auqui napese aübu nanaiña bama esarrü angelerrü. ⁹Sane caüma peneco auqui napese manu numuquianrrü, arrümanu chaübopü noirroborrü, nürirri choborese y Satanás, arrüna tarucu ñatachemacacarrü ümo macirrtianuca icu cürü. Tone ichepe bama esarrü angelerrü paquiancanama icu cürü.

¹⁰Auqui ñoncoi arrone nurria tosibirri auqui napese, nantü sane:

—Chauqui tutaesübuca uiti Tuparrü. Tütusio nüriacarriti Tuparrü, y nicusüurrütito naqui Aütörrti, naqui Cristo, itopiqui ta, tüpenecoti auqui napese naqui nantarrü uraboi bama usaruquитайqui isucarüti Tuparrü, naneneca y tobiqüia. ¹¹Arrüma macananama ümoti choborese, ta ui noto Nobirrama y ui arrüna ñanitacarrüma nomirria au nürirrti Jesús tücañe. (Itopiqui ta, coiño Nobirrama itoboma, türrimiacana tato nomünantü uimía.) Chücuasürüpü ümoma nisüboriquirrimia, itörrimianamacü ümoti Cristo, y coiñoma itopiquiti. ¹²Tari pucünuñama nurria bama aboma au napese. Pero arttürabopü bama abomainqui icu cürrü, y bama bavivico isu turrü, itopiqui artti choborese tüsürotitü acü ümoma. Tarucu nitüborirrti, itopiqui tusio ümoti, ta contoatai ayeti tato Jesús.

¹³Nauquiche tütusio ümo manu noirroborrü (naqui choborese) ta yaruraübutama acü, sürotü isiu manu paürrü aübo anati mecu ipiaümacarrü. ¹⁴Pero botorrio ümo manu paürrü uiti Tuparrü torrü nipia nutamonrrirri sürümanarrü, nauqui aso iché eana rroense, na aïñanai taha auna cauta ane acomorabo ümo pünanaqui manu noirroborrü. Acamanu artti Tuparrü bacheboti tuburibo ñome trerrü añörrü y merio. ¹⁵Arrümanu noirroborrü arapara turrü ahiqui, nauqui urriane narubaitu sapoco, nauqui apeo manu paürrü. ¹⁶Pero arrümanu cürrü bayurara ümo. Aurübo cürrü. Auqui arrümanu turrü ahiqui manu noirroborrü sürotü au manu nusuturrü. ¹⁷Ui arrüna sane manrrü nitübori manu noirroborrü ümo manu paürrü. Sürotito ahi aübu bama aübosirri, arrübama icocotama yacüpuccurrti Tuparrü y arrüna ñemanauntu ñanunecacarriti Jesús. ¹⁸Auqui atürayo manu noirroborrü abeu narubaitu turrü.

Arrümanio torrü numuquianca

13 ¹Auqui yasacatü ümo taman numuquianrrü ünantatai, cuatanene eanaqui turrü. Abe siete nitanurrü, y diez tarusüca, y diez nitapacürri. Ane nicörrü cütüpü manio nitanurrü, churriampatai nuburarrü ümoti Tuparrü. ²Arrümanu numuquianrrü yarrtai isiu naca nuitümürri. Nipopese tacana nipope nupaichabirri, y narurrü tacana naru nocütürüquiorrü. Artti choborese (manu noirroborrü cüturiqui) bacheboti icusüubu, itörrimiatatito nesarriti tronörrü ümo, tarucu üriacabo icu cürrü. ³Taman ubuturuqui manio siete nitanurrü obürio ümo. Rranrrü aco uirri, pero urriante tato. Namanaiña macirrtianuca icu cürrü cütobüsoma ui manu urriante tato. ⁴Iñanaunumati choborese (manu noirroborrü), itopiqui uiti atorri üriacabo manu ünantatai numuquianrrü. Manaunuma ito ümo manu numuquianrrü, namatü:

—Champü tacanache manu numuquianrrü, champüti naqui puerurrü ahiti aübu.

⁵Törrio ito ümo manu numuquianrrü nauqui puerurrü anitane arrüba chomirriampü ümoti Tuparrü aübu nentonauncurrü. Sane uirri ñome cuarenta y dos panca. ⁶Manitana churriampü ümoti Tuparrü y ümo bama aboma au napese ichepeti. Churriampito nurarrü ümo manu nipörrti ane acamanu. ⁷Törrio ito ümo manu numuquianrrü, na ahi aübu bama icocoromati Tuparrü aboma icu cürrü, cheperrtü macanana ümoma. Törrio üriacabo ümo

macrirrtianuca, y nanaiña bama aboma icu cürri. ⁸Sane caüma nanaiña bama bavivico icu cürri manaunuma ümo manu numuquianrrü, bama champürtrü corobo nürirrimia icu manu librurrü nesa manu Nobirrama, arrüna coiño tücañe (artri naqui Jesucristo). Icu manu librurrü abe bocorobo auqui tücañe numo aübo urriane cürri, nürirrimia bama champü nitacüru nisüboriquirrimia.

⁹Artri naqui rranrrü oncoi tari onsaperati. ¹⁰Arrübama macanama au preso ümo maquiataca, süroma ito au preso. Y arrübama batabayo ui cüsese, coiñoma ito ui cüsese. Arrübama icocoromati Tuparrü, tapü batabeboma yarrüperacarrüma cümenuti Jesús, tari oncomatü ümoti Tuparrü.

¹¹Auqui yasacatü ümo quiatarrü numuquianrrü, cuatanene auqui cütu. Abe torrü nitapacürri tacana nobirrarri, pero manitana tacanati choborese aübu nentonauncurrü. ¹²Ane ito nüriacarrü isiatai tacana manu primer numuquianrrü cuatanene eanaqui turri. Bacüpuru ümo bama bavivico icu cürri, tari iñanaunama manu primer numuquianrrü, arrümanu obürio ümo tücañe, pero urriante tato. ¹³Masamunu ito yarusürürrü milagrorri, hasta paquio pese uirri acü auqui napese isucarü macrirrtianuca. ¹⁴Ane matachemacana ümo macrirrtianuca oboi arrüba milagrorri omirriante uirri isucarü manu primer numuquianrrü. Bacüpuru ito ümoma nauqui asamuma taman santurrü tacana naca manu primer numuquianrrü, arrümanu obürio ümo ui cüsese pero chücoiñopü. ¹⁵Torrio ümo manu segundo numuquianrrü nauqui uirri puerurrü asübori y anita arrümanu santurrü. Taborioma uirri namanaiña bama chümanaunupü ümo manu santurrü.

¹⁶Uirrito süro nicororri cütüpü namanaiña bama macrirrtianuca, apü nepanauncu neherrüma o icutama. Yasutüma manu nicororri arrübama masiomanca, mayarusürüca, arrübama rricurrü y arrübama poberrü, arrübama mosorri y arrübama champü, enterurrüma bama aboma icu cürri. ¹⁷Arrübama champü nicororri apüma, chüpuerurrüpü acomporama ni apaventecapüma. Arrümanu nicororri tone nüri manu primer numuquianrrü. Tone nesarri número ümo nürirri. ¹⁸Rranrrü ümoti naqui tarucu ñapanauncurrti, nauqui atusi ümoti isane ümoche arrümanu numerorri nesa manu numuquianrrü. Arrümanu nürirri, ta icuqui cürtai. Seiscientos sesenta y seis nürirri.

Ñacantacarrüma manuma 144,000

14 ¹Auqui yasacatü ümo manu Nobirrama ane atüraiyo onü manu yiriturri nürirri Siön. Aboma ichepe ciento cuarenta y cuatro mil macrirrtianuca. Corobo icutama nüri manu Nobirrama (artri Cristo) y nürirrti Bae Tuparrü.

²Auqui rabotü auqui napese arrümanu tacanarrü arrone osüro turri o artü süuru. Tacana arrone mutañecana süümana violín. ³Macantarama arrümanu nuevurri macantacarrü esa manu tronorrü y esa manuma cuatro süborico y esa manuma ito mamayoreca. Champüti naqui puerurrü aipati arrümanu macantacarrü, cunauntañama arrübama ciento cuarenta y cuatro mil, bama tütaesüburu eanaqui nomünantü arrüpecuqui bama macrirrtianuca icu cürri.

⁴Arrümanuma ciento cuarenta y cuatro mil, tonema bama champü causane

nisüboriquirrimia yupu paüca tücañe auqui numo maübo nisunaunrrüma. Tonema bama champü nomünantü au nausasürrüma, maentañamatü isiu manu Nobirrama auna cauta sürotü. Arrüma taesüburuma uiti Cristo eanaqui macirrtianuca. Sane nauquiche arrüma cusürüboma atormia tacana macumanatarrü ümoti Tuparrü y ümo manu Nobirrama (o sea ümoti Cristo).
⁵Chipiacapüma apama, champü nünantü uimía.

Ñanitaca bama trerrü angelerrü

⁶Auqui yasacatü ümoti quiatarrü ángel anati basoroti apetaisürü cümüntaqui napese. Abe uiti nurarrrü Tuparrü arrüba champü nitacüru nomirria, arrüba uiche utaesübu eanaqui nomünantü, nauqui uraboiti isucarü bama süborico icu cürrü auqui nanaiñantai nacioneca, manitacaca y puebluca. Tosibicoti nurria, nanti sane:

7—Aupirru, apiñanaunrrü Tuparrü, itopiqui tiñatai manu horarrrü nesa bacurrtacarrü. Apiñanaunrrü naqui uiche urriane napese, cürrü, narubaitu tuca y nanaiña nantaituca.

⁸Isiuticau cuati quiatarrü ángel, tosibicotito nurria, nanti sane:

—Iñarrio, iñarrio manu pueblurrü Babilonia aübu namanaiña bama pohoso, itopiqui uimía churriampü nisüboriqui bama auqui piquiatata nacioneca.

⁹Auqui cuati quiatarrü ángel, tosibicotito nurria, nanti sane:

—Arrübama manaunuma ümo manu numuquianrrü y ümo manu santurrü y arrübama yasutiuma manu nicororrrü icutama o apü neherrüma, ¹⁰tonema bama carrticabo caüma uiti Tuparrü. Fuerte carrticurrrü ümoma uiti. Taquisürüma ui pese y ui azufre isucarü bama esarrrü angelerrü, y tacane isucarü manu Nobirrama (o sea isucarüti Cristo). ¹¹Arrümanu nausi carrticurrrü uiti Tuparrü sürotü ape, champü nitacüru nausiquirri. Chümacansarapüma naneneca y tobiquia. Tone taquisürüicürrü ümo bama manaunu ümo manu numuquianrrü y ümo manu santurrü. Tone ito taquisürüicürrü ümo bama yasutiuma arrümanu nicoro nüri manu numuquianrrü. ¹²Tapü arrübama icocoromati Tuparrü, tapü batabeboma caüma ui yarrüperacarrüma icümenuti Jesús. Tapü oncono uimía ñacoconauncurrüma ümo yacüpucurrrü Tuparrü y ümoti Jesús.

¹³Auqui ñoncoi taman manitacarrü auqui napese, nantü iñemo sane:

—Aiconomo arrüna sucanañü aemo: “Auquina caüma urria naca bama icocoromati Jesús arrrü coiñoma”. Sane te, nanti Espíritu Santo, arrüma coiñoma nauqui acansama pünanaqui trabacorrrü icu cürrü.

Cosecharrü icu cürrü

¹⁴Yasacatito caüma ümo taman cüsaüborrrü purusubi. Anati taman tacanati ñoñünrrü tümonso onü. Ane nitarusürrü oro. Ane mecuti taman osarrü bien otoro.

¹⁵Auqui cuati taman ángel auqui niporrrü Tuparrü, tosibicoti ümoti, nanti sane:

—Acosi icu cürrü cosechabocü. Tiñatai nitiempo cosecharrü. Tubupubu naurri cürrü.

¹⁶Auqui arrti maniqui tümonso onü cüsaüborrü sürotitü icu cürü.
Cosechaboti macrirrtianuca.

¹⁷Auqui cuati quiatarrü ángel auqui manu niporrti Tuparrü ane au napese. Ane ito uiti taman osarrü bien otero. ¹⁸Esaqui manu altar caüma cuati quiatarrü ángel, naqui ane nüriacarrti ümo pese. Manitanati fuerte ümoti maniqui ane osarrü uiti, nanti sane:

—Acosito ata uva icuqui cürü, chauqui tubupubu. (Arrüba nüta uva, tonema bama macrirrtianuca icuqui cürü, arrübama chicocoropümati Tuparrü.)

¹⁹Auqui sürotitü acü maniqui ángel atanti nüta uva. Numo tüchauqui uiti, iyarapatati au manu tacurrü canrrü cauta auparri iyo nobiyürü. Sane carrticurrü uiti Tuparrü ümo bama churriampü yachücoimia.

²⁰Parrio manu nüta uva saimiantai pueblurrü. Cuatanene niyürü. Arrümanu niyürü pururrü notorrrü. İnatai ichepe nubaru cabayuca notücürü y osüro trescientos kilómetros narubaiquirri.

**Manuma siete angelerrü bacheboma
tacürurrü carrticurrü**

15 ¹Auqui yasacatü au napese ane quiatarrü señarrü yarusürürrü. Yasacatü ümo manuma siete angelerrü bama uiche abetü manio siete taquisürücüca icu cürü. Arrümanio siete taquisürücüca toneño tacürurrü nesarrrti carrticurrü Tuparrü.

²Yasacatito ümo manu tacana narubaitu turü, tacana vidrio, ane ito pese eana. Yasacatito ümo bama chichübopümacü tücañe anauma ümo manu numuquianrrü y ümo manu santurrü. Chiyasutiupüma ito arrümanu nicoro nürirri, arrümanu nesarrü numerorrrü. Aboma atüraiyoa abeu manu narubaitu turü. Abe violín mecuma, arrümanio botorrio ümoma uiti Tuparrü. ³Macantarama arrümanu ñacantacarrrti Moisés naqui imostorrrti Tuparrü y ñiacantaca manu Nobirrama, namatü sane:

Yarusürürrü y champü tacanache arrüna naisamute, Señor.

Arrücü Tuparrücü, tarucu nacusüu.

Bien urriampae nachücoi ümo macrirrtianuca, chümapancarrüpü, itopiqui arrücü yarusürürrü yüriaburrü ñome ba nacioneca.

⁴İñacutipü naqui chübirrubupü aünanacü, Señor!

İñacutipü naqui chümanaunupü aemo!

Arrücüatai buenurrücü.

Cuamatü ñana macrirrtianuca auqui nanaiña nacioneca, nauqui anauma aemo, itopiqui chauqui tarrtaimia arrüna naisamute.

⁵Auqui yasacatü aurübo arrümanu niporrti Tuparrü ane au napese. Tusio tapo arrümanu nürirri santuario, auna cauta nacarrrti Tuparrü.

⁶Auqui tapo cuamatü manuma siete angelerrü bama uiche abetü manio siete taquisürücüca. Purusubi naibirrimia, bucuara. Poñoenoma ui oro.

⁷Tamanti uturuqui manuma cuatro süborico itorrimiatati ümoma taiquiana taman vasorrü oro, ataso ui nesarrti carrticurrü Tuparrü, naqui champü nitacüru nisüboriquirrti. ⁸Ataso ito caüma niporrti Tuparrü ui nausirri, ui nicusüurrti y ui nanentacarrü esati. Champüti naqui puerurrü aürotipo cheperrtü butacürusu manio siete taquisürücüca ui bama siete angelerrü.

Arrümanio vasoca nesa carrticurrü

16 ¹Ñoncoito caüma taman tosibirri auqui niporrti Tuparrü, nantü sane ümo manuma siete angelerrü:

—Amecosi apiyarapario icu cürrü arrümanio siete vasoca nesarrti carrticurrü Tuparrü.

²Auqui cusürüboti maniqui taman ángel aiyarapati auqui nesarrti vasorrü icu cürrü. Uirri caüma ububaüro tososoca icütüpü macrirrtianuca. Tarucu noborrocórrü y chomirriantempü tato. Enterurrüma bama ane nüri manu numuquianrrü icütüpüma y manaunuma ümo manu santurrü isiu nacarrü ububaüro tososoca icütüpüma.

³Artri maniqui segundo ángel iyarapatatito auqui nesarrti vasorrü onü narubaitu turrü. Isamunü notorrü turrü uirri tacana noto bama tücoiño. Mocoíño nanaiña arrüba bosüborico eana.

⁴Auqui artri maniqui tercer ángel iyarapatatito auqui nesarrti vasorrü omonü narubaitu nusüruca y nantaituca. Opisamunaño ito notorrü.

⁵Ñoncoito caüma nurartri maniqui ángel bacuirara yutacu tuca, nanti sane:

—Urria nacurrtaca arrücü Señor. Arrücü ananciatai tücañe y aca ito caüma.

⁶Arrübama bavivico icu cürrü itabairoma bama icocoromacü, arrübama manitanama au nüri. Iyarapatama notorrüma. Pero arrücü caüma aichamacama notorrü. Champü causane, aiñata ümoma tacana arrüna nisanutema.

⁷Auqui ñoncoito manitacarrü esaqui manu altar, nantü sane:

—Arrücü Señor Tuparrücü, urriampae nachücoi ümo macrirrtianuca. Ñemanauncurratoe nacurrtaca.

⁸Auquito artri maniqui cuarto ángel isupiutati auqui nesarrti vasorrü isu surrü, nauqui manrrü nipequirri. Uirri cürrubuma macrirrtianuca. ⁹Arrone nurria nicürrucurrüma. Pero ta, chiñocotapüma arrüba chomirriampatai nurarrüma ümoti Tuparrü, nauqui puerurrüpü aiquiaübuti arrümanu taquisürücürrü. Chiñorronconopümacü, ni anaumpüma ümoti.

¹⁰Auqui artri maniqui quinto ángel iyarapatatito auqui nesarrti vasorrü onü manu tronorrü nesa manu numuquianrrü. Tomiquianene ümo macrirrtianuca icu cürrü, ümo bama aboma iquiana nüriaca manu numuquianrrü. Ositoimia nuturrüma ui norroco carrticurrü ümoma. ¹¹Pero ta, chicoñocotapüma nisüboriquirrimia. Isamutemainqui nomünantü. Churriampatai nurarrüma ümoti Tuparrü, naqui anati au napese, itopiqui tarucu nitaquisürücürrüma oboi manio tososoca.

¹²Auqui arrti maniqui sexto ángel iyarapatati auqui nesarrti vasorrü onü manu sapoco nürirri Eufrates. Cüpüro turrü auqui. Sane nauquiche ane caüma cutubiurrü ümo bama mayüriabuca cuamatü auqui tansürü.

¹³Auqui yasacatü ümo manu noirroborrü y ümo arrümanu numuquianrrü ünantatai nacarrü y ümoti maniqui ñapanrrü profetarrü (tone arrümanu segundo numuquianrrü abe torrü nitapacürrü). Cuantio trerrü nausüpürrti choborese ubahiqui, tacana nubaca nurrapacaca. ¹⁴Arrio pasamunu milagrorrü, y omenotü esa bama mayüriabuca icuqui cürrü. Aburaboi isucarüma na aiyoberabaramacü aübu masortaboca ümo bahiquirri au manu nanenese ensümunu uiti Tuparrü, naqui champü tacanache nüriacarrti.

¹⁵Nanti Jesús:

—Amasasai nurria, arrüñü iseca tato ñana rrepenteatai tacanati cusüpürrü. Urria naca bama tabücoma urria nisüboriquirrimia. Arrümanu urria nisüboriquirrimia ta tacana naibirrimia arrüna aseabo. Urria naca bama bacuirara itacu manu purusubi naibirrimia, tapü amencoma cüsuasama isucarüti Tuparrü, aübu nicüsorrüma.

¹⁶Auqui arrümanuma mayüriabuca bama oberabara aübu nanaiña esarrüma masortaboca oboi manio trerrü nausüpürrti choborese süromatü saimía manu cürrü nürirri auqui hebreo “Armagedón”.

¹⁷Artti maniqui tacüurrü ángel isupiatati auqui nesarrti vasorrü auna sane ümo maquiütürrü. Auqui rabotü tosibirri auqui niporrti Tuparrü esaqui manu tronorrü. Nantü sane:

—¡Chauqui turriante!

¹⁸Auqui masüna, süuru, pocoro cürrü. Champü tüpocoro cürrü sane tarucapae auqui numo aübo aboma macrirrtianuca icu cürrü. ¹⁹Chepetobo cürrü au manu sürümanarrü pueblurrü, trerrü nichepesütürrü. Omiñarrito arrüba piquiatata puebluca icu cürrü. Artti Tuparrü aquionotiyü iyo manu yarusürtürrü pueblurrü, nürirri Babilonia. Rranrrti acheti carrticurrü ümo, itopiqui tüboricoti ümo. ²⁰Nanaiña arrüba cüca abe cümünta turrü ububacara y arrüba yirituca omiñarrito. ²¹Bupaquito auqui napese porriquiatoe noñoca onü macrirrtianuca, cuarenta kilo numi taman. Arrübama macrirrtianuca churriampatai nurarrüma ümoti Tuparrü, itopiqui tarucapae nitaquisürücürrüma oboi manio noñoca.

Manu paürrü churriampü nisüboriquirri

17 ¹Auqui yasacatü icümenuti maniqui taman uturuqui manuma siete angelerrü uiche nubaca manio siete vasoca. Cuati yesañü, nanti iñemo sane:

—Ariacu, itusiancaniona asucarücü arrüba carrticurrü ümo manu paürrü, arrümanu itorrimianüantai ümo mañoñünca, arrümanu ane tümonso ubabeu narubaitu tuca. ²Arrübama mayüriabuca icuqui cürrü amoncoma ichepe, tacana numuquianca. Orisübaboma ui nirrancarrüma ümo.

³Arrti ángel auqui quiatarrrü niyasata iquianatiñü au narubaitu rroense. Acamanu yasacatü ümo taman paürrü, ane tümonso chacu taman numuquianrrü cüturiqui. Abe nicororrrü icütüpiü manu numuquianrrü, churriampatai nuburarrü ümoti Tuparrü. Abe siete nitanurrü y diez nitapacürrü. ⁴Arrümanu paürrü ane naibirri morao y cüturiqui, ane ito nicoñoporrrü oro y arrüba omirriantai camanca y perlarrrü. Ane ito mecu taman coparrü oro aübu arrüba nomünantü uirri ahu, arrüba chomirriampatai nismute aübu mañoñünca. ⁵Ane ito corobo icuta arrümanu champüti atusi ümoti Nüirri, nantü sane: “Yarusüirrrü Babilonia”. Ui na paürrü ipiacama bama macrirrtianuca icu cürrü avivimia tacana numuquianca y nauqui anauma ümo bama masantuca. ⁶Auqui tusiatai iñemo que arrümanu paürrü orisübabo ui noto bama icocoromati Tuparrü y arrübama coiñoma, itopiqui urapomia nürirrti Jesús. Isütobüca nurria, nauquiche yasacatü ümo. ⁷Auqui arrti ángel nanti iñemo:

—¿Causane acütobü? Suraboira asucarücü arrüna champüti atusi ümoti isane ümoche arrümanu paürrü y arrümanu numuquianrrü abe siete nitanurrü y diez nitapacürrü, ichacuche ane: ⁸Arrümanu numuquianrrü tananca süborico tücañe, pero caüma champüqui. Cuatanene tatito ñana auqui nusutu cürrü, arrüna champü nitacürrü, pero contoatai coiño. Tarucu nicütobü bama macrirrtianuca icu cürrü. Tonema bama champü nürirrmia icu manu librurrü auna cauta bocorobo nüri bama champü nitacüru nisüboriquirrmia, auqui numo aübo urriante cürrü. Cütobüsoma ui na arrtaimía manu numuquianrrü arrümanu ananca süborico tücañe y caüma champüqui, pero ane tatito ñana.

⁹Arrüna nisura caüma rranrrü ümoti naqui ipiaca: Arrümanio siete nitanuca, toneño siete yirituca omonüche ane manu pueblurrü auna cauta bavivico manu paürrü. ¹⁰Arrümanio siete nitanuca tonema ito siete mayüriabuca. Eanaqui manuma siete cincoma tücoiñoma, arrti maniqui sexto anatiqui caüma, y arrti maniqui quiatarrrü cuatiqui, pero arrtü cuati, contoatai pasao nüriacarrrü. ¹¹Arrümanu numuquianrrü ananca süborico tücañe y caüma champüqui, tonenti maniqui octavo yüriaburrü, abu arrti tamanti eanaqui manuma siete. Pero ta, coiñotito ñana.

¹²Arrümanio diez tapacüca tonema diez mayüriabuca, bama üriaburucamainqui. Torrio üriacaboma ichepe manu numuquianrrü. ¹³Ichepatai na ñapensacarrüma. Batrabacarama ümo manu numuquianrrü aübu nanaiña nicusüurrüma y nüriacarrüma. ¹⁴Bahiyoma aübu Nobirrama, naqui Cristo, pero macananati ümoma, itopiqui tonenti Señor ümo bama señorerrrü icu cürrü y tonentito yüriaburrü ümo bama mayüriabuca icu cürrü. Aboma ichepeti bama tasuruma uiti, bama tacümanauncunuma uiti. Tonema bama chiñocotapüma ñacoconauncurrüma ümoti.

¹⁵Auqui arrti maniqui ángel nantito iñemo:

—Arrümanio narubaitu tuca ubabeuche ane tümonso manu paürrü itorrimianüatai ümo mañoñünca, toneño arrüba nacioneca, manitacaca, puebluca y macrirrtianuca icu cürrü. ¹⁶Arrümanio diez tapacüca, o sea

manuma diez mayüriabuca tüboricoma caüma ümo manu paürrü. İñocotama cüsusa, İñatema nañeturrü, y tacane İñonocotama. ¹⁷Uiti Tuparrü aisamunema sane, itopiqui sane nırrancartı. İñatama ichépatai ñapensacarrüma, nauqui aitorrimıama ümo manu numuquianrrü nüriacarrüma, cheperrtı cocono nurartı Tuparrü ümo arrüna sane. ¹⁸Arrümanu arrtai paürrü, tone manu yarusürürrü pueblurrü, ane nüriacarrü ümo mayüriabuca icuqui cürrü.

Nıñarriqui manu pueblurrü Babilonia

18 ¹Auqui yasacatü ümoti quiatarrü ángel sırotitü acü auqui napese. Tarucu nüriacartı. Anentarrü icu cürrü uiti. ²Fuerte ñanitacartı, nantı sane:

—Chauqui tiñarrio manu pueblurrü Babilonia, tiñarrio te. Tone caüma nıpo bama machoboreca y arrübama nausüpütu machoboreca. Tone ito caüma niyopo ba omünantatai nutaumanca. ³Arrübama macrirrtianuca auqui nanaiña nacioneca chauqui tümameso ñapanauncurrüma ui arrüna churriampü ñanunecaca manu paürrü. Arrübama mayüriabuca icuqui cürrü bavivicoma ichepe tacana numuquianca. Arrübama macomercianteca icuqui cürrü rricurumacü ui na tarucapae nenarrırri.

⁴Auqui ñoncoi quiatarrü manıtacarrü auqui napese, nantü sane:

—Apıquiaübusaño auqui manu pueblurrü Babilonia, itopiqui arraño isaütaıqui, tapü ane nomünantü aboi isıquımıa y naqui tapü autaqıısürüca ichepema. ⁵Tütarucapae nomünantü uımıa, tırranrrü aıñanai icu napese. Arrtı Tuparrü chütacürusupü ñaquıoncorrtı iyo ba chomırriampü uımıa.

⁶Apatoco ümoma tacana arrüna uımıa aume. Apache doblerrü carrtıcurrü ümoma itobo na nısamutema ümo bama maquiataca. ⁷Tücañe tarucu pıerrta uımıa y tarucu nenarrırımıa. Pero caüma apache ümoma tarucu norrocorrtü y tacane itaqıısürücüboma. Sane ñapensacarrüma ümomantoe: “Arroñı urrıa nusaca, yüriaburrü oñü, champürtü viurarrü oñü, ni utaqıısürüpü”.

⁸Sane nauquiche au tamantai sapese cuantıo itaqıısürücüboma: cürüpürrü, concorrtü, suchequirrı y auqui üro ui pese manu pueblurrü. Arrtı Tuparrü naqui Señor tarucu nıcüsürrtı, arrtı te bacurrtaratı aübu.

⁹Arrübama mayüriabuca amoncoma ahu y arrübama masamunu pıerrta ahu areoroma itacu, arrtü arrtaımıa ausıu nurrıa noncorrtü. ¹⁰Arrtayomatü auqui iche, itopiqui bırrubuma ui na arrtaımıa nıtaqıısürücürrü. Namatü sane:

—ıTaqıısürataı pueblurrü Babilonia, arrümanu tarucapae nüriacarrü! Rrepenteataı İñataı nesarrü carrtıcurrü.

¹¹Arrübama macomercianteca areoroma ito, sucheboma itacu, itopiqui champütıqui manrrü naqui macomporara nenarrırımıa, ¹²oro, plata, omırriantai camanca, perlarrü, pinu corteca arrüba cüturıqui y morao niyusurrü, seda, sueca omırriantai y arrüba omırriante ui noho elefante y arrüba omırriante ui pinu suese, bronce, yerurrü y arrümanu canrrü mármol, ¹³canelarrü, nasaite arrüna urrıantai norımıa, rrorıocorrtü, mırra, perfume, vıno (niyü uva), nasaite, tubarrırri trıgo, buyeca, nobırraca, cabayuca,

carroca, arrübama mosorrü hasta nausüpiturrti ñoñünrrü. ¹⁴Auqui manu pueblurrü ensoro ito pünanaquimia nanaiña nobüta sueca arrüba tarucapae nirrancarrüma macirrtianuca ñome. Nanaiña arrüba omirriantai y arrüba bucuara omiñarrio. Chanantopü abe tato au manu pueblurrü.

¹⁵Arrübama comercianterrü rricurumacü auqui naca manu pueblurrü. Arrtayomatatai auqui iche, areoroma itacu. Birrubuma ui na arrtaimia nesarrü carrticurru. Namatü sane:

¹⁶—Takisüratai na yarusürürrü pueblurrü, arrüna tacana arrone päürü ane coñortai naibirri, cüturiqui y morao nisurrü, oro nicoñoporrü, omirriantai camanca y perlarrü. ¹⁷¡Quiti sane! Nanaiña iñarrio au tamantai horarrü.

Arrübama capitán ñome barcoca ichepe bama pasajerurrü y arrübama batrabacara isu turrü arrtayomatatai auqui iche ümo nausi noncorrü. Namatü:

¹⁸—Champü quiatarrü pueblurrü tacana arrüna tücañe.

¹⁹Iñatama cürü itama nauqui atusi nisuchequirrimia, areoroma y tosibicoma, namatü:

—Pobrerrtai manu yarusürürrü pueblurrü, itopiqui uirri rricurumacü bama ane nesarrüma barco. ¡Quiti sane! Au tamantai horarrü nanaiña iñarrio.

²⁰Rabotito manitacarrü auqui napese, nantü sane:

—Pero arraño bama aboma au napese, bama icocoromati Tuparrü, ichepe bama apostolerrü y arrübama profetarrü, tari aupucünu, itopiqui ocümanati Tuparrü autacu. Matoconoti Tuparrü ümo manu pueblurrü Babilonia.

²¹Auqui tamanti ángel naqui tarucu nicusüurrti, iquiampetati taman canrrü sürümanarrü isiu naca batubarrichorrü canrrü. Yarutaübutati au narubaitu turrü, nanti sane:

—Sane ito botaboiqui arrümanu pueblurrü Babilonia, tacana arrüna canrrü botabo sobi, chanantopü anen tato, ²²chanantopü oñoncoi tato música ui violín, burriirri y cornetarrü. Chanantopito rabotü yatrabacaca bama batrabacara, ni rabopütito batubarriqui. ²³Ni autusiquipito basaruca ni rabopütüqui pierreta tübübürrü. Arrübama comercianterrü auqui manu pueblurrü tarucu nüriacarrüma tücañe icu cürü. Arrübama auqui manu pueblurrü matachemacanama ñome nacioneca ui na nipiagama.

²⁴Uimia taborioma bama profetarrü, bama uiche uraboi nurarrti Tuparrü y arrübama icocoromati, ichepe bama maquiataca taborio icu cürü.

19 ¹Auquimanu ñoncoi ñanitacarrüma fuerte nurria bama sürümanama macirrtianuca au napese, namatü sane:
iAleluya! Uiti Tuparrü utaesübuca.

Yarusürürrü nanentacarrü easti, champü tacanache nicusüurrti.

²Ñemanauncurratöe yacurrtacarrti.

Bacheboti carrticurru ümo manu päürü ichübüatai ümo mañoñünca, arrümanu uiche amameso nisüboriqui bama macirrtianuca icu cürü. Matoconoti Tuparrü itobo na niconco bama imostorrti.

³Namatü tatito:

iAleluya! Champü nitacüru nausi manu nesarrü carrticurü.

⁴Auqui arrümanuma veinticuatro mamayoreca ichepe manuma cuatro süborico bachesoiyoma, manaunuma ümoti Tuparrü, naqui tümonso au tronorrü. Namatü sane:

Amén, sane te, aleluya.

⁵Rabotito manitacarrü esauqui tronorrü, nantü sane:

Apiñanaunrti Tuparrü nanaiña bama imostorrti, bama rrespetabo ümoti, bama tarucu nicuarrüma y arrübama champüatai nivialequirrimia icu cürü.

Machepecatarrü: Nipocorrti Cristo au napese

⁶Auqui ñoncoito arrümanu sane tacana manitacaca, nura bama sürümana macrirrtianuca o tacana nosücü chama turrü y arrtü süuru fuerte. Namatü sane:

iAleluya! Chauqui türiabucati Tuparrü, naqui Señor, naqui chücupiusupü nicusüurrti.

⁷Upucünuna, uiñanaunati.

Tiñatai manu nanenese anche posoti Jesucristo, tonenti Nobirrama. Chauqui tacomorabo nicüpostoti.

⁸Torrio ümo nauqui aipiaünanü pinu naibirri, purusubi y cuaratai. Arrümanu naibirri pinu, ta tone na urria nisüboriquirrimia bama icocoromati Tuparrü. (Arrüna nicüpostoti Jesús, tonema bama icocoromati.)

⁹Auqui nanti maniqui angelerrü iñemo:

—Aiconomo arrüna sane: “Urria nacarrüma bama tasuru ümo pierrra arrtü posoti Jesucristo, tonenti Nobirramati.

Nantito iñemo:

—Tone arrüna ñemanauntu nurarrti Tuparrü.

¹⁰Auqui yachesoquia esa nipoperrti ángel nauqui rranaumpü ümoti, pero arrti nanti iñemo:

—Tapü anaunca iñemo, itopiqui arrüñü imostotito Taparrü tacana arrücü y tacana bama maquiataca aruquitaquí, bama yasutiuma nurarrti Jesús. Anaun ümoti Tuparrü, tone. Arrübama profetarü manitanama uiti Espíritu Santo, urapoimia nürirrti Jesús.

Anati taman chacu cabayurrü purusubi

¹¹Auqui yasacatü ümo napese aurübo. Yasacatü ümo taman cabayurrü purusubi. Anati taman chacu, nürirrti “Ñemanauncurratoe”, chütacürusupü nucua ümoti. Chencañaotipü arrtü bacurrtarati y bahiyoti. ¹²Nirrtorrti tacana nonco pese. Abe itati sürümana tarusüca. Ane corobo nürirrti ciütüpüti, arrüna arrtiatai tusio ümoti. ¹³Ane naibirrti chapaquio ui notorrtü. “Nurarrti Tuparrü” nürirrti. ¹⁴Cuamatito ichepeti arrübama sürümana masortaboca auqui napese, purusubi naibirrimia, aboma yuchacu cabayuca bupurusubito. ¹⁵Tusio ahiquiti taman cüsese bien otero, uiche acheti ümo macrirrtianuca

auqui nacioneca. Arrone nurria yacüpucurrti ümoma, tacanarrtü baparrioti ui baretarrü. Carrticaboma macrirrtianuca uiti, tacanarrtü baparriquia nûta uva iyo niyürrü. ¹⁶Ane corobo cütüpü naibirrti auna sane ümo nitaparrti arrüna sane: “Üriatu mayüriabuca” y “Señor ümo bama señorerüma”.

¹⁷Auqui yasacatü ümoti taman ángel atürayoti isu surrü. Tosibicoti fuerte ñome nutaumanca, arrüba abe bupasoro. Nanti sane ñome:

—Ausiapata apiyoberabasaño ümo nipierrtarrrti Tuparrü, ¹⁸nauqui auba nañetu bama mayüriabuca y nañetu bama bacüpuruma ümo masortaboca, nañetu bama ito arucu ümoma, numañetu cabayuca y arrübama aboma yuchacu, nañetu bama macrirrtianuca, nañetu bama librerrü y bama mosorrüma, y nañetu bama tarucu nicuarrüma y arrübama champüatai nivialequirrimia.

¹⁹Yasacatito ümo manu numuquianrrü uiche aiyoberabarama bama mayüriabuca icuqui cürrü aübu nanaiña nesarrüma ejército, nauqui ahimia aübuti maniqui anati chacu manu purusubi cabayurrü (tonenti Cristo) y aübu bama aboma ichepeti.

²⁰Auqui eno manu numuquianrrü y enotito maniqui ñapanrrü profetarrrü (manu segundo numuquianrrü), naqui masamunu milagrorrrü isucarü manu numuquianrrü, nauquiche matachemacanati ümo bama macrirrtianuca, arrübama yasutiuma nicoro nürirri y manaunuma ümo manu santurrü. Ichépe penecoma au manu narubaitu turrü pese nacarrü, arrümanu omo ui azufre.

²¹Tapü arrübama maquiataca taborioma ui manu cüse ahiquiti maniqui anati chacu cabayurrü. Y arrüba nutaumanca ubabeco nurria ui nañeturrüma.

Nüriacarrrti Cristo ñome mil añorrrü

20 ¹Auqui yasacatü cümenuti maniqui taman cuati auqui napese. Ane uiti niyabe nusutu cürrü, arrüna champü nitacürrü. Ane ito mecuti taman bruturrtai carenarrrü. ²Eno uiti manu fierarrü, arrümanu chaübopü noirroborrrü, tonenti choborese, naqui Satanás. Tomoenoti uiti ñome ba mil añoa. ³Iyaruraüburutiti au manu nusutu cürrü. Iñamatati tato aübuti. Iñatati sellorrrü icu nitururrrü, tapü matachemacanatiqui ümo macrirrtianuca auqui nacioneca, cheperrrü bupasao manio mil añoa. Yopürücü manio mil añoa tiene que asoquisüti tato ñome ba mantucubatai naneneca.

⁴Auqui yasacatü ñome tronorrü. Amoncoma tümonsoma ubahu arrümanuma torrio üriacaboma na acurrtama. Yasacatito ümo nausüpiü bama tüsüro nitanurrrüma tücañe itopiqui urapoimia nürirrti Jesús y arrüna urapoimia nurarrrti Tuparrü. Tonema ito bama chümanaunupü tücañe ümo manu numuquianrrü y arrümanu santurrü y tacane chiyasutiupüma arrümanu nicoro nürirri icutama, ni apü neherrümampü. Süboricoma tato, torrio ümoma üriacaboma na üriaburuma tacana mayüriabuca ichepeti Cristo ñome ba mil añoa. ⁵Tonema bama cusürüboma asüborimia tato eanaqui macoiñoa. Tapü arrübama maquiataca macoiñoa champürrrti süboricoma tato, cheperrrü

bupasao manio mil añoa. ⁶Arrübama cusürübo asiüborimia tato, tonema bama urria nacarrüma, cuasürüma ümoti Tuparrü. Chanantopü acoma tato. Sacerdoterrüma ito caüma ümoti Tuparrü y ümotito Cristo ñome mil añoa.

Nitapenequirrti choborese

⁷Arrtü tübupasao manio mil añoa, emecanati tato choborese auqui nusutu cürrü. ⁸Sürotitü caüma atachemacati ümo genterrü auqui nacioneca icuqui nanaiña cürrü. Batasuruti ümoti Gog y ümoti Magog, nauqui aiyoberabarioma nanaiña nacioneca, nauqui ahimia aübuti Tuparrü. Cütüpürrü nubiquirrimia tacana cüosorrü abequi narubaitu turrü. ⁹Cuamatü tacana arrobe nociürriariquia, süromatü itupecu manu parrcanirri auna cauta naca bama icocoromati Tuparrü y itupecu ito manu nesarrti pueblurrü Tuparrü, arrümanu cuasürü ümoti. Pero arrti Tuparrü bacipuruti pese auqui napese ümoma. Üroma uirri. ¹⁰Tapü arrti choborese, naqui macocono, penecoti au manu narubaitu turrü pese nacarrü, arrümanu omo ui azufre, auna cauta ito penoco manu numuquianrrü ichepeti maniqui ñapanrrü profetarrü. Champü nitacüru nitaquisürücürrüma acamanu, naneneca y tobiquia.

Tacürurrü bacurrtacarrü

¹¹Yasacatito ümo taman sürümanarrü tronorrü, purusubi. Arrti Tuparrü anati tümonsoti ahu. Isucarüti caüma omensoro cürrü y napese. ¹²Yasacatito ümo bama tücoiño, bama tarucu nicuarrüma tücañe icu cürrü y arrübama chütonempatai. Atürayoma esati Tuparrü. Auqui ubaurübo libruca y aurübo ito manu quiatarrü librurrü auna cauta abe bocorobo nüri bama champü nitacüru nisüboriquirrimia. Arrti Tuparrü caüma bacurrtarati aübu bama macoiñoa isiu arrüna ane corobo iyucu manio libruca, o sea arrüna nisamutema tücañe.

¹³Cuama tato bama macoiñoa eanaqui narubaitu turrü (tonema bama ubacarama tücañe) y cuamatito auqui nicü bama macoiñoa. Arrti Tuparrü bacurrtarati aübu namanaiña isiu na nisamutema tücañe icu cürrü. ¹⁴Arrti maniqui nürirrti “concorrü” ichepe arrümanu nicü bama macoiñoa penecoma au narubaitu turrü pese nacarrü. ¹⁵Y nanaiña bama champü nürirrimia icu manu librurrü nesa süboriquirri penecoma au manu narubaitu turrü pese nacarrü (infierno), arrüna uiche coiñoa tatito.

Urriante nuevurrü napese y nuevurrü cürrü

21 ¹Auqui yasacatü ümo quiatarrü napese nuevurrü y quiatarrü cürrü nuevurrü, itopiqui arrüna primer napese y arrüna primer cürrü omensoro y champüqui narubaitu turrü. ²Yasacatito ümo arrümanu pueblurrü samamecana, arrüna nuevurrü Jerusalén cuatü auqui napese esauiti Tuparrü. Bien coñocono tacana arrone cupiquirri rranrrü apo. ³Ñoncoito fuerte manitacarrü auqui napese, nantü sane:

—Tarinan, tütane caüma niporrti Tuparrü eana macrirrtianuca, bavivicoti arrüpecuma. Tonema caüma nesarrti genterrü. Arrti Bae Tuparrü anati caüma aübuma. ⁴Uiti caüma tocheno nareorrüma, isübutati nisucürrüma, champütiqui coiño, ni asuchepümainqui, ni aninquipü norrocorrü, itopiqui tüpasao arrümanu tücañe.

⁵Auqui manu nanti maniqui tümonso au tronorrü:

—Amasasatü, arrüñü ñasamuca caüma nuevurrü tato nanaiña arrüba abe. Nantito iñemo:

—Aiconomo, itopiqui ñemanauncurratoe arrüna nisura.

⁶Nantito iñemo:

—iChauqui turriante! Arrüñü anancañüantai auqui ñemonco y yacaiquito ñana. Arrti naqui tosüco, ichamacati turrü arrüna bachebo süboriquirri, chirranquiquiapü itobo pünanaquiti. ⁷Arrübama macanana ümoti naqui macocono torrio ümoma arrüna sane tacana macumanatarrü ümoma. Arrüñü Tuparrüñü ümoma y arrüma masaütaiqui. ⁸Tapü arrübama birrurrüma y arrübama iñoconomati Tuparrü, arrübama malorrü, arrübama mayatabayoca, arrübama bavivicoma tacana numuquianca, arrübama macheseruca, arrübama manaunuma ümo bama masantuca y nanaiña bama mañapanca, tonema bama sürobotü au manu narubaitu turrü pese nacarrü, arrümanu omo ui azufre. Tone caüma arrümanu segundo niconcorrüma.

Arrüna nuevurrü pueblurrü Jerusalén

⁹Auqui cuati taman uturuqui manuma angelerrü uiche nubaca manio siete vasoca nubausü manio siete tacürrü taquisürücüca. Nanti iñemo:

—Ariacu tauna, curi na itusianca asucarücü arrümanu cupiquirri nicüpostoti Jesús, tonenti Nobirrama.

¹⁰Auqui quiatarrü niyasata caüma iquianatiñü esa manu taman sürümanarrü yiriturrü petaisürü. Aitusiancanatito isucariñü arrümanu pueblurrü samamecana, nürirri Jerusalén, cuatü acü auqui napese esaquiti Tuparrü.

¹¹Cuaratai ui nicuacarri Tuparrü, tacana arrone cama coñomantai, anentarrai pürücü tacana vidrio. ¹²Ane taman narriporrü canrrü itupecu, sürümanarrü, petaisürü, aübu doce turuca. Abeu cada taman tururrü anati taman ángel bacuirarama yutacu. Ane corobo iyucu manio turuca nobüri arrümanio doce familiarrü auqui manu nación Israel. ¹³Auna sane ümo tansürü abe trerrü turuca, ümo maquiütürrü trerrito ümo mancarrü trerrito, y ümo nimüümürrü trerrito. ¹⁴Abe doce canca posürümanaca iquiana manu narriporrü, tapü taübüco. Ane corobo ubapü nüri bama doce nesarrü apostolerrü Nobirrama.

¹⁵Artri maniqui ángel manitana saübuñü ane taman vararrü oro uiti, uiche ameriraca manu pueblurrü aübu nanaiña yuturuca y arrümanu narriporrü. ¹⁶Arrümanu pueblurrü ichepatai narubaiquirri y nabaiquirri. Auqui caüma sürotitü aimeriracati manu pueblurrü ui manu vararrü. Dos mil doscientos kilómetros nabaiquirri, napetaquirri y narubaiquirri.

¹⁷Imeriracatatito narriporrû: sesenta y cuatro metros napetaiquirri, isiu nimeriracarrûma macirrtianuca, arrûna uiche ameriracati maniqui ângel.

¹⁸Arrûmanu narriporrû urriante ui pururrû canrrû arrûmanu nûirri jaspe. Arrûmanu pueblurrû oro nacarrû y anentarrtai pûrûcû tacana vidrio.

¹⁹Arrûmanio doce canca posûrûmanaca abe iquiana narriporrû mocoñoopo ui aruqui nanañantai omirriantai camanca. Arrûmanu primer canrrû ane nicoñooporrrû jaspe, arrûmanu segundo ane nicoñooporrrû zafiro, arrûmanu tercero ane nicoñooporrrû âgata, arrûmanu cuarto ane nicoñooporrrû esmeralda, ²⁰arrûmanu quinto ane nicoñooporrrû ónice, arrûmanu sexto ane nicoñooporrrû cornalina, arrûmanu séptimo ane nicoñooporrrû crisólito, arrûmanu octavo ane nicoñooporrrû berilo, arrûmanu noveno ane nicoñooporrrû topacio, arrûmanu décimo ane nicoñooporrrû crisoprasa, arrûmanu undécimo ane nicoñooporrrû jacinto y arrûmanu duodécimo ane nicoñooporrrû amatista.

²¹Arrûmanio doce turuca, ta doce perlarrû, cada taman tururrû urriante ui taman perlarrû sûrûmanarrû. Arrûmanio cayaca au manu pueblurrû pururrû oro, anentarrtai pûrûcû tacana vidrio.

²²Champûrrtû yarrtaiqui arrûmanu niporrti Tuparrû au manu pueblurrû, itopiqui arrti Bae Tuparrû anati acamanu ichepeti Jesucristo, arrûmanu Nobirrama. ²³Champû nûmoche surrû ni pamapû nauqui acua au manu pueblurrû, itopiqui ane acamanu nanentacarrti Tuparrû y Nobirrama.

²⁴Arrûna genterrû auqui nacioneca pucûnuñama ui nanentacarrti Tuparrû. Arrûbama mayûriabuca icuqui cûrrû iquiatama nenarrirrimia au manu pueblurrû, arrûba tarucu niyucuarrrû. ²⁵Arrûmanio turuca chumamanapû au sapesey champûiqui tobirri acamanu. ²⁶Arrûbama macirrtianuca auqui nacioneca iquiatama arrûba manrrû cuasûrû ûmoma au manu pueblurrû, auna cauta iñanaunumati Tuparrû. ²⁷Nuncapû ane nomûnantû acamanu. Chentrabopûma bama isamutema arrûba chomirriampû ûmoti Tuparrû, ni arrûbamapû mañapanca. Sûromampo arrûbamantai ane nûirrimia icu manu librurrû ane ui Nobirrama, arrûmanu icuche naca nûri bama champû nitacûru nisûboriquirrimia.

22 ¹Auqui itusiancatatito isucarûñû maniqui ângel taman sapoco cûcheseña tuma ahu, arrûna bachebo sûboriquirri. Osûro esauqui manu nesarrti tronorrû Tuparrû y arrûmanu Nobirrama. ²Osûro cûmuintaqui manu cayerrû principal. Isiu arrûba nabeurrû abe sueca arrûba pachebo sûboriquirri, arrtû ubaquo nobûtarrrû. Cada taman panrrû ubupubu nobûtarrrû. Arrûna nubasurrû urria ûmo nubatarrrû uiche acurama macirrtianuca auqui nacioneca. ³Acamanu champûitiqui naqui paurremana. Nesarrti tronorrû Tuparrû y Nobirrama ane acamanu y arrûbama imostorrti baserebioma ûmoti. ⁴Acamanu arrtaimia nurria nisurrti y ane nûirrti corobo icutama. ⁵Acamanu champûiqui tobirri, champû ûmochequi basarurrû, ni surrûpû, itopiqui anentarrû ûmoma ui nicuarrti Tuparrû. Arrûna nûriacarrûma champû nitacûrurrû.

Tüsaimia niyequirrti Señor

⁶Auqui nanti maniqui ángel iñemo:

—Ñemanauntu arrüba manitacaca. Artti Tuparrü naqui Señor uiti tücañe manitanama bama profetarrü. Sane ito caüma icüpurutiti naqui esarrti ángel nauqui uraboiti isucarü bama imostorrti arrüna contocaü pasabobo.

⁷—Conto ise tato —nanti Jesús—, urria nacarrüma bama oncoimia y arrübama icocotama arrüna nurarrti Tuparrü ane corobo icu na librurrü.

⁸Arrüñü Juan ñoncoi y yarrtai nanaiña arrüna sane. Nauquiche tiñoncoi y tiyarrtai, yachesoiquia esati maniqui ángel uiche aitusianca isucarüñü nanaiña arrüna sane, nauqui rranumpü ümoti. ⁹Pero arrti nanti iñemo:

—Tapü aisamute arrüna sane. Arrüñü ito imostorrti Tuparrü, tacana arrüci y arrübama aruquitaquí, bama urapoimia nurarrti Tuparrü, y arrübama icocota arrüna corobo icu na librurrü. Anaun ümoti Tuparrü, tone.

¹⁰Auqui nantito iñemo:

—Tapü aiñanecaquio arrüba manitacaca abe bocorobo icu na librurrü, itopiqui tüsaimia arrümanu ensümunu, anche acoco. ¹¹Arrti naqui masamunu nomünantü, tari sequiboti aübu, arrtü rranrti. Y arrti naqui churriampü nisüboriquirrti, tari sane ito uiti. Pero arrti naqui urria nisüboriquirrti, tari seguibotito sane ñasamucurrti nomirria y arrti naqui itorrimiatati nisüboriquirrti ümoti Tuparrü, tari itorrimianatiyüqui manrrü ümoti.

¹²—Amasasai nurria —nanti Cristo—, conto iseca tato. Cuatü sobi arrüna naucua sobi, ümo cadati taman isiu na nisamutenti. ¹³Arrüñü anancañüantai auqui ñemonco y yacaiquito ñana. Nanaiña omirriante sobi y butacürusu tatito isucarüñü y arrüñü yacaiqui.

¹⁴Urria nacarrüma bama iconocotama nisüboriquirrimia, tacanarrtü iyarrübitama naibirrimia, nauqui puerurrü aanema nüta manu suese bachebo isüboriquiboma, y nauqui perurrüma aüromampo au manu pueblurrü nuevurrü, Jerusalén. ¹⁵Tapü arrübama iñoconomati Tuparrü ichepe bama macheseruca y arrübama bavivico tacana numuquianca y arrübama mayatabayoca y arrübama manaunuma ümo masantuca y nanaiña bama mañapanca, onconoma ñana türüpo.

¹⁶Arrüñü Jesús rracüpuca ümoti niyesa ángel nauqui uraboiti nurria arrüna sane isucarü bama icocoromañü. Arrüñü eanaqui nesarrti familiarrü David. Arrüñü anentarrü sobi, tacana arrone nocoborese arrtü cuatü nanenese.

¹⁷Arrti Espíritu Santo ichepe nicüpostoti Jesús, arrübama icocoromati, namatü:

—Ariacu.

Arrti naqui oncoiti nurarrti Tuparrü, tari nantito sane:

—Ariacu.

Y arrti naqui tosüco, tari yebati, arrtü rranrti, tari chabati manu turrrü bachebo süboriquirri, macumanatarrtai ümoti.

¹⁸Arrüñü Juan, surapoi arrüna sane isucarü bama oncoimia arrüna ane corobo icu na liburrü:

—Artri naqui bachebo onrribo nicororrü, artri Tuparrü bachebotito ümoti omonrribo manio taquisürücüca abe bocorobo icu na liburrü.

¹⁹Y artri naqui ane isane iquiaübutati eanaqui na nicororrü, artri Bae Tuparrü iquiaübutatito pünanaquiti nüta arrümanu suese bachebo süboriquirri y chüpuerurrüpi aicheti ümoti aürotipo au manu pueblurrü samamecana, arrüna icütüpüche abe corobo icu na liburrü.

²⁰Artri naqui urapoiti arrüna sane nanti:

—Sane te, conto iseca tato.

Amén, ariacu te, Señor Jesús.

²¹Tari icunüsüancanati año Señor Jesucristo. Amén.